

Antoine de Saint-Exupéry

Der Kleine Prinz

Antoine de Saint-Exupéry


Der Kleine Prinz



9 788363 636883

Antoine de Saint-Exupéry

Der Kliny Fjyst



Antoine de Saint-Exupéry

Der Kliny Fjyst

myta obrozla fum oütor



Der jyšty titl - *Le Petit Prince*

Ejwerlet fum Tiöma fum Dökter (Tymoteusz Król)
án Joánná fum Måryńok-Jäcki (Joanna Maryniak)

S'gykrysul fum ájband - Jüśja fum Biöetuł
(Justyna Majerska-Sznajder)

Ym projekt blyn dy obrozla fum oütor gybroüht.

- © fyr Wymysiöeryś fertolkyn fum Tiöma fum Dökter
(Tymoteusz Król) án Joánná fum Måryńok-Jäcki
(Joanna Maryniak)
- © fyr Wymysiöeryś edycij fum Centrum for Füśnan
án Praktyk yr Kultüryśa Wetercijung, 2019

ISBN: 978-83-63636-88-3

Finansjyt fur Fundacyj „Instytut Artes Liberales”



Dy roüsgjöewyn:
Centrum for Füśnan án Praktyk yr Kultüryśa Wetercijung
Tál „Artes Liberales”
Waršawyser Uniwersyetet
Gyeleſoft „Wymysiöejyn”



Center for Research and Practice
in Cultural Continuity



UNIWERSYTET
WARSZAWSKI



Warśaw - Wymysou
2019

FJYR LEON WERTH

Kyndyn zułta mer fercajn, do'h ho dos bihla y am grusa menca gydedykjyt. Yh ho a wihtikja oüswag: dar grusy menç ej der besty gyşpon, wyła yh i ufer wełt ho gyhot. Yhy ho an andyn oüswag: dar grusy menç kon bygrajfa ołys, zugioe bihla fij dy kyndyn. Yhy ho an dryta oüswag. Dar grusy menç wönt y Frankräjh, wu's hyngjyt an froüzt. Ejm djef zájn oüsgyhułfa. Wen oły di oüswag ny głyngja, wył yh dos bihla dedykjyn ym kynd, wo jyśter wiöe dar grusy menç. Oły grusy ɬoüt wün amöl kyndyn (oder s'gydenkja ny hefa föna). Yh ferbeser füt māj dedykacyj:

YM LEON WERTH
WI'À WIÖE À KLINER BÜW.


I

WÍ'H HOT ZÁHS JÜR, zoh yh ámöł à wunderšejn obrozła
y ám bihla fum Ürpuś, wo his „Ejwerławty kistioeryja”. S’stełt
à boáyter für, wo zy šlung à roüpfí. Dos ej à kopi fum obrozła:



Ym bihla ziöet mà: „Dy boáytyn šlyngja jyr öpfer uf ámöł,
ony koüyn. Nöhta kyna zy zih mej ny rjyn án zy šlöfa diöh
záhs mönda án cjen”.


Derzánk kom's mer hefa fun wundermjera ym rānpuś áj,
merhołw derkom yh cy dam, myt ám fiöerwikja blájstift, màj
jyšt obrozła UFCymöla. Màj obrozła numer 1 sóüt ázu oüs:



Yh wáz màj ejwerkunst yn grusa łöüta án yh fret zy, op zy
fu mem obrozła strah hota.

Zej ziöeta mer cyrik: „Fyrym zełd à kapelüshüt imanda bygroüza?“.

Maj obrozla štełt kán kapelüshüt für. S'štełt à boäyter für, wo'á fercjet án olifänt. Yhy mölt derfjyr s'ynwikjy fur boäyter, do dy grusa łouüt zuła's bygrajfa. Zej djefa inda hon hylf bym bygrajfa. Maj obrozla numer 2 wiöe ázu:



Dy grusa łouüt röta mer cü, dy obrozla myta cügymahta boäytyn ufer zájt cy kön, án zih mejer myt geografyj, gyšiht, ráhyn án gramatyk cy interesjyn. Ázu, wi'h hot záhs jür, hynderlis yh dy wyndelikjy mölerkarjer. Yh wiöe fu dam wäggyfüt gywiöda diöh dos, do's ym obrozla numer 1 án obrozla numer 2 s'ozan fałt. Dy grusa łouüt bygrajfa nymer nist ny zoüwer án dos köst dy kyndyn mi, wen zy zuła'á stájd ołys fürlen.

Yhy müst à andyn byruf oüskloün, án yh ījyt mih oüs, mytum eroplan cy fjyn. Ejweron ufer wełt flug yh ábysla rym. À dy geografyj, derging zih mer zjyr, ys's wür. Yhy kund ufa jyśta oügabłyk Xina án Árizon underşajda. Dos ej nejtlik, wen'á yr nahtcájt felöza ej.

Azu hot yh y mem ława ferśidnikjys myta ferśidnikja ogyzana łouüt cy tün gyhot. Yhy ho łang byn grusa łouüt gyławt. Yhy zoh zy fu nöndum. Maj ozan fíjyr zy wiöd diöh dos ny gryser.

Wi'h án menća trof, wo's mejh doüht, do'á bygrájft, maht yh ufum án eksperiment myt mem numer 1 – obrozła, wo yh's inda byhiłd. Yh wułd wysa, op'á fjj dy wür bygryfa wiöe. Oder á ziöet mer inda: „Dos ej á kapelušhüt”. Diöh dos ziöet yh cün'um áni fu kám boáyter, áni fun ürpyša áni fun pyša nist ny. Yhy stełt mih inda diöt rym, wo har mih bygrájfa kund. Yhy kuzt cünum fu bryć, golf, polityk án bindln. Á dar grusy menć wiöe fruł, do'á hót án zyta fernynftikja menća kena gyłjyt.

II

ÁZU ŁAWT YH áłan, ony imanda, mytum wür cy kuza, bocár càjt, wi's zih mer der eroplon hót hejngybröht ufer Saharwistaj, záhs jür y dam. Yhta hót zih hejngybröht y mem motor. Án diöh dos, do'h kán mehánikjer án ká pasažjyn myt mer ny hot, fjetikt yh mih o cym priöebjyn, do'h oüsku, ganc áłan, myt dar swjera ryhtnan. Dos wiöe fjjr mejh á zah fum tut oba ława. Yhy hot nok uf aht tag s'woser cy trynkja.

Á jyśta öwytyt bej'h ufum zand ájgyślöfa, toüztyt mágjn fur bywönta ad. Yh hot mih mejer o, wi á wagabund fum cyśliöena séjf ufum bölašyfta ym mytułsta fum Grusmjer. Štełt jüh für, wosfer á wunder mejh hot, ym mügjafri, wen á łahawaty, kliny štym mejh ufgewekt hot án zy ziöet:

– Feter..., mölt mer án barüs!

– Wos?

– Mölt mer án barüs...!

Yh sprung uf dy fis, wi wen s'water mejh het gytrofa. Nöhta bywöšt yh mer dy oüga. Yhy sóüt cü. Án yh zoh á klin menćla, á ganc wyndelikjys, y mjyr myt ahtnan cüzan. Dos ej der besty öebroz fönum, wo yh'a śpyter ho gymaht. Nátjyrlik ej oder

maj obrozla hefa wingjer öetik owi der model. Yhy bej dos oder ny šylik. Mjyr hota dy grusa łoūt dy mölerkarjer oglyjt, wi'h hot záhs jür. Yhy ho mih nist ny gyljyt möla, jok dy boaytyn, wo zájn cü oba ufa.

Yhy šoūt oder uf di zah myta wunderkoülikja oüga. Ny fergast, do'h wiöe toüzyt majln fu ám bywönta regjon. Á maj klin mencla šoūt mer áni felün, áni dermjedyt, áni derhungyt, áni derdyyýt, áni deršroka ny oüs. Á šoūt giöe ny oüs wi á kynd, wo zih höt felün ym mytułsta fu ár wistaj, toüzyt majln fu ám bywönta regjon. Wi'h sun tüs yhta ziöen, ziöet yh cünum:

– Oder... wos mahsty dö?

Án har ziöet mer derzank ganc myld, s'ander möl, á zjyr wihtikjy zah:

– Feter..., mölt mer án barüš...


Wen dy gyhájmy kájt ej cy cüdryklik, do tiöe mà giöe ny átkán zájn. Dos šoūt ju ganc wyndelik oüs, á toüzyt majln fu ola bywönta jptyn, án yr nzyhjerkájt fjym tut, cug yh roüs fum dibzak á kiöet papjyr án á fader. Oder derzank kom's mer áj, do'h ym másta hot gyljyt geografyj, gysicht, rähyn án gramatyk án yh ziöet ym klinia mencla (ábysla trouřik), do'h ny kon möla. Á ziöet mer cyryk:

– S'šot ju nist ny. Mölt mer án barüš.


Wáł yh hot ni bocy dar cájt kán barüš ny gymölt, mölt yh jum ás fu cwe obrozla, wo'h kund möla. Dos mytum cügyłosa boá. Mejh hot á grus wunder, wi'h hüt s'klin mencla y mjyr cyrykziöen:

– Ná!, ná! Yh wył kán olifant yr boayter. Dy boayter ej zjyr nybezpjénik, á der olifant ej štusnik. By mjyr ej wing płoc. Yh djef hon án barüš. Mölt mer án barüš.

No to yh ho'á gymölt.



Dos ej der besty öebroz fönnum, wo yh'á špyter ho gymaht.



À zoh myt ahnnan cü, à nöhta:
– Ná! Dar ej šun zjyr krank. Maht
mer án noüa.

Yh ho án zyta gymölt. Máj gyšpon
łaht cün mer šejn cü, myt ájzan.


– Dy zist... dos ej kà barüs. Dos ej
à bök. À höt hjenyn...

Yhy ho máj obrozla ufs nojy
gymaht. Oder s'wiöd ogystusa, wi dy ɬecta:

– Dar ej cy ołd. Yh wył án barüs,
wo'á wyt lang lawa.

Dioh dos, do mer dy gydułd fałt,
wàł yh mih fwydyt, do'h zo ofanga
men motor cy demontjyn, cajhnyt
yh dos obrozla, án yh wüf:

– Dos ej à kastla. Der barüs, wo dy'á
wyłst ej ynwik.



zoh s'moüł fu mem junga ryhter
uftloühta.

– Grod ázu wułd yh'á! Štüdjysty, do
dar barüs wyt djefa hon hefa groz?

– Fyrym?


– Wàł's ben mer zjyr wing płoc ej.

– Dos glengt bystymt. Yhy go der
à ganc klinia barüs.

À nágt kám obrozla záj hiöet.

– À ej ju ny ázu klin... No zejh
jok! À ej ádślöfa...

Àn ázu ɬjyt yh à Klinia Fjyśt
kena.



III

YH DIÖFT HON hefa cajt, wål yh uf dos kom, fu wu'á roüssstompt. Mejh doüht's, do der Kliny Fjyšt, wo mejh hefa ejwerfret, máj fröga ny höt ghyüt. Dos wün cüfelikjy wjytyn, wo mer olys ámałik bylıöehtha. Wi'á zoh s'jyсты möl máj eroplan (yh wa men eroplan ny ufmöla, dos obrozła wje zájn fjyr mejh cy śwjer), fret'á:

– Wos ej dos, je zah diöt?

– Dos ej ká zah. Dos floügt rym. Dos ej à eroplan. Dos ej máj eroplan.

Àn yh wiöe štułc fu dam,
do'h'um dos ziöet, do'h rymflug.

No do rüf'á:

– Wos kuzt dü? Dü bystand fum
hymuł rogyfoła!

– Ju – ziöet yh gyhałda.


– Áh!, dos ej łahawat...

Àn der Kliny Fjyšt cyłaht zih
zjyr şejn, wo mejh derjyht. Yh wje
weła, do dy łouüt máj ungyłyk myt
ahntan traktjyn.

Nöhta wüf'á cü:

– No do dy štomst oü fum hymuł
roüs. Fu wyler planet bysty?

Y dar wájl derzoh yh à lihtla ym
gyhájma fu zem zájn, àn yh fret'á
gryhta:



– Štomsty ju fu ár andyn planet?

Oder har höt zih ny gymált. Å go mytum hiöet gyhałda cü, wi‘á y mem eroplan cüzoh.

– Dos ej wür, do dy myt dam ny wyst zájn kuma fu zjyr wájtum.

Ån‘á zunk y à łang cytriöema. Nöhta, wi‘á men barüs fum dibzak roüsnom, füng‘á o záj sácła diöhcymedytjyn.

Štełter jüh für, wosfer à wunder mejh hot diöh dos hołpiöen fun andyn planeta. Yh kymyt mih, yht mejer fu dam cy derwiöera:

– Fu wun štomsty roüs, māj klin menčła? Wu ej dos „by djyr“? Wu wyłsty men barüs mytnama?

Å ziöet mer nöm štylüşik ja medytjyn.

– Dos, wo ej güt, ym kastła, wo dy mer höst gan, do’s s’nahts wyt zájn fjyrum à hytła.

– Frälik. Å wen dy wyst gyhühja, yh wa der gan oü à strang, do dy‘á ym tag zost obynda án à nála.

S’šoüt oüs, do di propozycyj à Kliny Fjyśt hot derśroka:

– Obynda? Dos ej wyndelik.

– Oder wen dy‘á ny wyst obynda, wyt‘á jynta gejn, oba wyt‘á zih feljyn...

Å māj frájnd füng wejder o cy łaha:

– Oder wu zo‘á gejn?


– Jyntwun. Għajh byfür...

Derzánk ziöet der Kliny Fjyśt wihtik:

– Oder s’šot ju nist ny, by mjyr ej wing ploc!

Ån, myt ábysla melánholi, s’kon mejglih zájn, ziöet‘á cü:

– Għajh byfür kon mā ny gejn cy wájt.



IV

YH HO DIÖH dos derwiöert à ander wihtikjy zah, dos, do záj hamyplanet wiöe ny hefa gryser owi à hyt!

Dos kund mih ny wundyn. Yhy wöst güt, do hyndyn grusa planeta owi Ad, Jüpiter, Mars, Wenus, wyły wiöda gytoüft, gyt's hundyta fu andyn, wyły zájn miöehysmöl ázu klin, do mà zy koüm ny derzit diöh à teleskop. Wen der ástromon ány föna ufdekt, tiöeft' à zy „0“. À nent zy cym bajspil: „Asteroid 3251“.



Yhy ho wihtikjy bywájza cy gliöen, do dy planet, fu wyler der

Kliny Fjyšt roüsštompft,
hást „Asteroid B612“.


Di Asteroid bla derzan
ołdyst ym 1909 diöh
à teleskop diöh à tjkjyśa
ástromon.

Derzánk maht' à gru-
sy demonstracyj fu zemoü
smytułn ufum Cwy-
sałendyśa Ástronomyj-
kongres.

Oder nimyd höt'um ny
gygliöet, diöh dos, wi' à
wiöe ogycün. Dy grusa
łoüt zájn ázu.

Ufs gyłyk fjys ozan fur
Asteroid B612, à tjkjyśer






diktator his záj fulk under tutströf, zih ylropejyś ocycin. Der Åstromon maht záj demonstrácyj ym 1920 jür ufs nojy, y ám zjyr feša ocug. Án dos möl oly wün mytum ánik.

Wen yh jüh ziöet di klina kájta fur Asteroid B612 án wen

yh jüh jyr numer wetergo, to diöh dy grusa łöüt. Dy grusa łöüt hon gan cifyn. Wen der jüh ziöet fu ám noja gyšpon, zy fren jüh nymer ny ym dos, wos ym wihtiksta ej. Zy ziöen nymer ny: „Wosfer á štym höt'á? Wosfer špejla höt'á gan? Kłöüt'á mulkjadrymułn cyzoma?“. Zy fren jüh: „Wifuł jür höt'á? Wifuł bridyn höt'á? Wifuł wánt'á? Wifuł gywynt záj foter?“. Jok nö dam štüdjyn zy, do zy'á kena. Wen der ziöet yn grusa łöüt: „Yh zoh á šejny hyt fu bławhruta cigln myta geránja yn festyn án toüa ufum dah...“ zej kyna'á di hyt ny fürsteła. Má djef'á ziöen: „Yh zoh á hyt fíjr hundyt toüzyt franka“. Do wan zy ufrüfa: „O, wi šejn!“.

No do wen der'á ziöet:
„Á bywájz uf dos,
do der Kliny Fjyšt
höt gyistnját, ej dos,
do'á wiöe prehtüšík,
do'á höt gyhaht án do'á
wułd hon án barüs.
Wen má wył án barüs,
do ej dos á bywájz uf



dos, do‘à istnját“. Zej wan šytułn myta aksułn àn zy wan jüh kyndiś traktjyn! Oder wen der‘à ziöet: „Dy planet fu wyler‘à roüssstompt, ej dy Asteroid B 612“, zej wan gliöen àn zy wan jüh gan rü myt zen fröga. Åzu zájn zy śun. Má djef cün‘à ká frejwuł fjyr dos ny hon. Wajl dy kyndyn müsa uf dy grusa ɬoüt ájzan nama.

Wjyr, wo wer wysa, ym wos zih s’ława dryt, ájzyn yns ny yms hefa fren. Di kistiöeryj het yh oü liwer wi à wundermjer ogyfanga. Yh kynd ju hon gyziöet: „S’wiöe ámöł à kliner Fjyśt, wo‘à ławt uf är planet, wo wiöe ny hefa gryser wi har zoüwer, àn‘à diöft hon à gyşpon.“ Derzank wjyn zy’s liwer hjyn di, wo s’ława fwy dy wür bygrájfa.

Yhy wje ny weļa, do má máj bihla fjyr yht cy ɬajhtys höt. S’ferdroüst mih, wen yh di gydanka dercył. S’ej eta śun záhs jür ferhejn, wi máj gyşpon myt zem barüs fütcug. Yhy fercył’s ym mästa ym dos, do’h’s ny fergas. Bo s’ej troürik, àn gyşpon cy fergasa. Oder àn gyşpon höt ny ider gyhot. Àn yh weļd zu ny wada, wi dy grusa ɬoüt, wo zy zih mytacifyn interesjyn. Åkurat diöh dos ho’h mer à fiöerwakastla àn à piöer blájstifta gykoüft.

S’ej ju śwjer, y men jün wejder cy möla ocyfanga. Nö mej, wen‘à ni ny hot gypriöebjyt nist ny cy möla, ok à cügyłosan àn ufgyłosan boåyter wi’à hot gyhot záhs jür. Frålik wył yh dy portreta wi ym gynoüsta áñöhmöla. Oder yh kon dos ny wysa, op yh dos wa derkrigja. Å obrozła głyngt, à ander amst śun mej ny. Oü yr grys jer yh mih ju. Ámöł ej der Kliny Fjyśt cy grus. Ámöł ej‘à wejder cy klin. Àn myta fiöerwa fu zen flák fercwájwuł yh oü. Zu postárćá’h ámöł beser, ámöł ślahter. Oü byn wihtikja klinikkájta jer yh mih byştymt. Oder fjyr dos djef‘à mer hon ká frejwuł. Máj gyşpon höt my‘ś ni ny fürgyłet. Ejn doüht’s

gywys, do yhy har bej. Oder yhy kon ju füt ny zu wi har, à barüś diöh á kosta oüszan. Do bej'h fylájht ábysla wi dy grusa ɻoüt. Yhy mü old zájn gywiöda.

V

IDA TAG DERWÖST yh yhta nojys fu zer wełt, fu zem wågfiöen, fu zer ráz. Záj gydanka köma ámałik án diöh cüfoł. Zu kom yh á dryta tag ufa dramat fum baobab. Oü dos ej dank barüś gyšan, bo der Kliny Fjyšt höt mih zu gylik gyfret, wi wen'á štiöek fercwájwułt het:

– Á barüś fryst gan štroüh, ys's ny wür?

– Ju,s'ej wür.

– O, do bej'h oder fruw!

Yhy ho ny ganc bygryfa, fyrym's zu wihtik wiöe, do dy barüśa kliny štroüh frasa. Oder der Kliny Fjyšt höt ácügyziöet:

– Do frasa zy oü baobaba?

Yhy ho's ym Klina Fjyšta fürgylet, do dy baobaba kà štroüh ny zájn, ok zy zájn kjyhagrus. Oü wen'á á gancy had fun olifanta het mytgybröht mytum, wjyn zy ju ny postarćán á baobab ufcyfrasa.

Wi'á maj gydanka fun olifanta ghyüt höt, füng'á o cy ɬaha:

– Fylájht zełd má zy áner ufa andyn šteła...

Oder gryhta ej'á ufs gyśajty kuma:

- Wål dy baobaba grus wahsa, zájn zy nö klin.
- Dos ej wür! Oder fyrym wyłsty, do dáj barüś kliny baobaba ufffryst?


À ziöet mer cyryk:

- S'ej güt, łö's. À ziöet's grod zu, wi wen dos dy gywynliksty zah ufer welt wje zájn. Mejh höt's oder gyknüt yr zejt, di zah cy ferstejn.

Fjy dy wür go's ufer planet fum Klina Fjyšta, wi uf oła planeta, güty flanca án šodnikjy flanca. Án diöh dos oü güty kjenla fun güta flanca án šodnikjy kjenla fun šodnikja flanca. Kjenla zájn oder ungyzan. Zy ślöfa hynderlystik yr ad, wål's y ám gyfelt ufcykajma. Do's cyśpełt án štrekt zih šmy kár zun átkán, myt ám fajna, štyła štenguł. Wen's á štenguł fum riwla oba ruza ej, kon'á's lön wahsa, wi's wył. Oder wen's gejt ym á šodnikjy flanc, mu má's šun öz kájm oüsrajsa. S'wün ferśidnikjy groüzlikjy kjenla ufer planet fum Klina Fjyšta... Dos wün kjenla fun baobaba. Zy łöga ejweron ufum planetbödum. Án wen's cy špot wyt zájn, wyt'á á baobabboüm

mej ny roüskyna.
À cyſtrekt zih ufer ganca planet án'á štyht zy myt zen wücułn diöh.
Án wen dy planet ej cy klin, án cy hefa baobaba wahsa ufer, kon zy zih ufſprengja.

– Dos ej á frög fu dyscyplin – fercyłt mer der Kliny Fjyšt špyter.





— Wen dy daj mügjarymgycela fjetik höst, müsty gryhta ofanga daj planet ymcygejn. S'baobabkroütik djef à gryhta roüscin, wål má's fum ruzakroütik kon underşájda. Wen zy klin zájn, kon má zy giöe underşájda. Di at köst hefa mi, oder di ej ju ląjht.


Àmöl höt'á mer cügyröt, do'h à šejn obrozla fu dam zo maha, do dy kyndyn y mer hamyt oü dos bygrájfa wjyn.

– Wen zy jynt ámöl oüswandyn – ziöet'á mer – Kynda zy dos nytikja. Wen mà záj at oü ámöl zu zájn ły, wi zy ej, ys's ká problem. Oder by ám baobab kymt dos inda ufs šláhty. Yh kant ámöl à planet, uf wyler à foüłpełc höt gyławt. À höt dráj štengułn kroütik ferzan...

Àn zu mölt'á di planet, wi zy mer der Kliny Fjyšt höt byśrejwa. Yhy bej dos ny, zu morályś cy kuza. Oder di ungywyskájta, di dy baobaba tün kyna, zájn zu unbykant, àn dy ungywyskájta uf ár asteroid zájn zu fest, do yh mih dos möl fu dam ohon zo gyluza. Wegja dam kuz yh: Kyndyn! Gat'üh öbaht fjyn baobaba!

Do mág gyšpona zih fu dar ungywyskájt byhita zeļa, wo zy y jyn àn y mjyr dret, ho'h ju zjyr łaŋg ejwer mem obrozla gyat. Dy łyjr, di yh by dam ga, ej ju ołys wat. Jyr fret'üh fylájht: Fyrym zájn y dam bihla ká ander zu öetikjy obrozla hyna, wi di fun baobaba? Dos ej ju łaſht cyrykcyziöen: Yh ho's gypriöebjyt, oder s'wułd mer ny głyngja. Wi'h dy baobaba mölt, ho'h à zyty grusy wihtikkájt gyśpüt, do's mih byrüt.





VI

JU, KLINER FJÝST! Štyklawájz kom yh uf daj klin, medytjynfuł ława. Łangy cajt ferblyn nok dy mylda zunaundergeng. Yhy kom uf dos à dryta tag s'mügjys, wy dy mer höst gyziöet:

– Yh liw zunaundergeng. Gejwer že yns à zunaundergang osoün.

– Wjyr müsa oder nö hiöera.

– Hiöera uf wos?

– Hiöera, wäl dy zun undergejt.

Ufs jyšty oügabłyk hot dih ju wunder, oder füt hösty śpyter

fu djyr zoüwer gyłaht. Ån dy höst cy mjyr gyziöet:
– Mehtings inda, do'h bej dyham!

Fjy dy wür. Dos ej ju wyslik, do y Frankräjh dy zun unddergejt, wen's y Ameryk ej mytag. Wen'å diöt å ym zunaundergang wył cüsoün, myht mà y ár minüt uf Frankräjh fligja. Oder ufs grusy ungyłyk ej Frankräjh hefa cy wájt. Oder uf der klina planet djefsty nok den śymuł ábysla weter cöwa. Do kyndsty cüzan wi's fynster wjyd, wen dy jok wełdst.

– Ån tag zoh yh å zunaundergang drájänfjycik möł!
Ån ábysla śpyter hösty cügyziöet:

– Dy wäst ju, wen mà zjyr trourik ej, höt mà zunaundergeng ym hacta.

– Ym tag fun drájänfjycik möł, wiöesty ekstra trourik?

Uf dos höt der Kliny Fjyśt nist ny cyrykgzyziöet.

VII

Å FYNFTA TAG hülf mer wejder der bartüs å weter gyhájmy kájt fum ława fum Klina Fjyśta cy derkrigja. Gylik, ony nist fret'å mih, wi wen'å wje dy früht fu ár łang diöhstdüdjya züg rorájsa.

– Å barüs, wen'å kroütik fryst, fryst'å oü blimla?

– Å barüs fryst ołys uf, wo'å zit.

– Oü djenyńikjy blimla?

– Ju, oü djenyńikjy blimla.

– No do uf wos zájn dy djenyn?

Yh ho's ny gywöst. Yh hot grod fejł cy tün, bo'h wułd å kájł, wo štekja bław, fu mem motor roüsnama. S'tüt mer zjyr bang, mój awaryj wiöd mer wo ámöł stráśnikjer ån s'sláhsty wiöe,

do māj trynkwoser wo ámöl wingjer wiöd.

– Uf wos zájn dy djenyn?

Der Kliny Fjyšt fergos ni kā frög, wen'ā zy gystełt höt. Yhy wiöe myta gydanka ganc by mem kájł án yh ziöet'um máłajht-wos cyzoma.

– Dy djenyn zájn giöe uf nist, dos ej á rány átkánikkájt fun blimla!

– O!

Nö ár wájł höt'á dercijnt cün mer gyziöet:

– Yhy gliöe der ny! Blimla zájn swah. Zy zájn łajhtgloüwik. Zy wjen zih wi zy kyna. Zy gliöen, do zy myta djenyn wágsioehja.

Yhy blå stył zyca. Y dar wájł kom's mer áj: Wen yh dan kájł eta grod ny krig, mü'h'á myt ám homer noüsslon. Do underbroh mer der Kliny Fjyšt wejder māj medytjyn:

– Gliöesty würik, do dy blimla...

– Ju ná. Yhy gliöe nist. Yhy ho's nok zu gyziöet. Yhy ho grod wihtikjer zaha cy tün!

À zoh mer scüdát cü.

– Wihtikjer zaha!

À zoh mer cü, wi'h mih myt mem homer yr hand án myta šwiöeca, bysmjeta fyngjyn ejwer yhta tökt, wo'a's fjyr yht šenklikjys mü hon gyhot.

– Dy kuzt ju wi dy grusa łoüt!

Dos maht mer ábysla šand. Underbiöemt ziöet'á mer ácü:

– Dy ferdryst ołys. Dy mahst oły duł!

À wiöe fji dy wür dercijnt. À šotułt záj gyłdera, gydryty łöda ym wynd.

– Yhy ken á planet, uf wyłer ławt á hjer, wo'a ej rut ufum gyzyht. À höt nö kā blimla ny gyriht. À höt nö ni kā štamla ny gyzan. À höt nö ni nimanda ny gyliwt. Ni höt'á nist andystys ny gymaht, ok gyráhyt. Án ida tag ziöet'á wi dü: yhy bez

à ogyzaner klop! Yhy bej à ogyzaner klop! Fu ɬouter štułc wiöe' à šun ganc ogykwuła. Oder dos ej ká klop, dos ej à pylc!
– Wos ej'á?

– À śwamppylc.


Der Kliny Fjyśt krigt gafer fum cün.

– Fu milona jün wahsa yn blimla djenyn. Fu milona jün wada dy blimla zuwizu fun barüsa ufgýfrasa. An fjyr dejh ys's ny wihtik, wen' à uf dos wje weła kuma, cy wos zy zih zu mynikja, do's' à djenyn wahsa,

wen zy uf nist ny
tejgia? Yr ślaht cwy-
śa barüsa àn blimla
wi ny wihtik? Ej dos
ny gynoü zu ogyzan
àn wihtik wi s'rähyn
fum ufgykwułan, ru-
ta kłopa? An wen yh
à bimla ken, wo's
àłan ej ufer wełt,
wo's zystwun njynt
ny gyt, nok ufmajner
planet, àn wen ámöł
s'mügjys à kliner
barüś dos bimla myt
ám áncikja bysła un-
gywys ofjetikja wyt,
ys's füt ny wihtik?

À wiöd rut àn' à
kuzt weter:

– Wen imyd à bimla
höt ɬiw, wo's nok



ámöl gyt uf oły milona án milona štam, do maht's án gyłyklik, nok wen'á y ejm cüšoüt. Do fret'á zih: Máj blimla ej jynt diöt hesa. Wen der barüs oder dos blimla uffryst, do dynkt's'án, do oły štam feršwynda! Án dos zuł ny wihtik zájn?

À kund nist mej ny ziöen, bo uf ámöł cyzoüwyt'á zih yn wosertropa. S'wiöe naht gywiöda. Yhy let máj gyrojg uf dy zájt. Men homer, men kájł, düst án tut wün mer ánik. S'wiöe uf ám štam, uf ár planet, uf mer planet, ufer Ad, uf wyler áner y ám Klina Fjyśta mü hon oüsgyhułfa. Yhy nom'á y dy henda. Yhy wánt'a. Yhy ziöet: S'blimla, wo dy's łiwst, ej ny ungywys. Yhy möł der à fraskiöb fij den barüs. Yhy wa der fij daj blimla à coün möła... yh...

Yhy wöst ny, wo yh weter zułd ziöen. Yhy wiöd ju ganc duł. Yhy wöst ny, wi'h mih cünum kund derkrigja. S'ej fuł fun gyhájma kájta, s'land fun wosertropa.

VIII

BAŁD MAHT YH mih myt dam blimla bykant. S'wün šun inda ufer planet fum Klina Fjyśta blimla, zjyr gywynlikjy blimla myt jok ám kranc fun płacła. Zy diöfta hon ká płoc án zy ferhyndyta nimanda. Zy wühsa ámöł ym groz uf án zy feršwunda ym öwyt wejder. Oder dos ány ej án tag oüsgyśosa fu ám kjenla, wo's waräs fu wu wiöe kuma, án der Kliny Fjyśt höt y dam kájm, wo'á ganc andyśt wiöe wi dy ander kájma, zjyr gynoü cügyzan. S'kynd á noüy öet fum

baobab zájn. Oder šun bałd hüt dos kroütik uf cy wahsa àn füng o, à blimla ufcybrengja. Der Kliny Fjyśt śpüt, wi'á ym ufwahsa fu ár ogriöemnikja knösp cüzoh, do à wunderšejny öüsziht föner roüsgejn wyt. Oder s'Blimla wułd gywynlik ny ufhjyn, bráter cy wada. Záj šejnhájt rájft bywjet y jer grina jam. S'höt záj fiöerwa myt öbaht öusgykłou. S;brát zih ámałik, s'ștełt záj blimłapłacła ás hynderum andum. Ejs wułd ny zu cyknytyt ufgejn wi dy mylihtypła. Ejs wułd nok ym fuła glanc fu jyr šejnhájt uf dy wełt kuma. Hej! Ejs wułd šejn zájn! Záj gyhájm rymgycela toüyt tagałang. Án ámol s'mügjys, grod bym zunaufgang, dakt's zih uf.

Án ejs, wo's zu akurat gyat hot, gant án ziöet:

– Ah! Yhy ho mih grod ufgewekt. S'ej mer ład, yhy bej à wurer šoözuł.

Der Kliny Fjyśt kund zen wunder ny uffałda:

– Wi šejn dy byst!


– Ny wür? – ziöet s'Blimla štyłnik – Án yh bej grod y dar càjt gybüñ wi dy zun.

Der Kliny Fjyśt ej gryht
uf dos kuma, do's ny cy
gyhałda wiöe, oder s'wiöe
ázu interesántyś.

– Yh štüdjy, mà djef eta ufa
mügja asa – kuzt's füt –
Wen der zu güt wjyn zájn,
fu mjyr cy denkja.

Do wiöd der Kliny Fjyśt
rut, bröht'á fryś woser án'a
undergus s'blimla.

Zu knüt's'a würik bałd myt
zer grusa hjersoftikkájt.



Àn tag cym bájspil kuzt's
fu zen fjyr djenyn àn's
ziöet cym Klina Fjysta.

– Di kyna lâjht kuma, dy
tigyn, myt jyr pazyry!

– S'gyt kâ tigyn uf mer
planet ny – ziöet'um der
Kliny Fjyst cyryk – Dy
tigyn frasa ju kâ groz.

– Yhy bej kâ groz –
ziöet'um s'Blimla y zis-
um tün cyryk

– Fercâjt mer...

– Fun tigyn fjet yh mih
ny, oder yhy ho strah fum diöhcug. Hoter kâ parawan?

Strah fum diöhcug? Dos ej ny ganc gylyklik fjyr à flanc. –
döht der Kliny Fjyst – Dos Blimla ferlangt ju fejł...

– S'nahts müster mih bywjen. S'ej ju zjyr kałd ben'üh dyham.
S'ej ny güt cügystełt. Diöt, fu wun yh roüsptom...

Do underbroh's'um zoüwer. Ejs kom oüz à kjenla. S'kund
nist fun andyn wełta ny wysa.
Rokuma, do's by àm zyta
lajhta łouğjyn wiöe gykritt,
höt's cwe oba drâj möl ghyüst,
do's à Klina Fjysta wàgslýt.

– Der parawan?

– Yhy wułd grod nöhum gejn,
oder yh ho diöh ojer gykuz
ferzoümt.


Do hüst's nö àmöl śmy àn's
wułd'um myt dam zen gywysa
ferhyndyn.



Gük'á's höt hacagan gyhot, füng der Kliny Fjyśt bałd o, ufys cu fercwájwułn. À höt jyr łajht gywüfa wjytyn gyzect gynuma án'a wiöe diöh dos zjyr ungyłyklik gywiöda. – Yhy zuł'um ny hon cügyhüht – fercył'ta mer ámöł – Ma djef yn blimła ni ny cühühja. Wer djefa'a cüzan án jyr roüh ájyduma. Máj Blimła

derwejwułt máj gancy planet myt zem roüh, oder yhy wiöe fu dam ni ny gyłyklik. Di gyšihta fun pazyrym, di mejh zu interesjyta, di dýyfta mih byrüt hon.

À ziöet mer: Yhy wiöe derzánk ny ymständ, dos cy bygrájfa! Yh het's ny fu zen tyta áni ny fu zen wjytyn šeca. Ejs ruh án hioeht fjyr mejh uf. Yhy djef ni ny zájn wágganga. Yhy zuł ju hynder jym gyhájnträjn uf záj frájyn kuma zájn. Blimła zájn fuł fun átkánnikkájta. Oder yhy wiöe cy jung cy wysa, do'h's łiw ho.



IX

YH ŠTÜDJY, DO'À gybroüht cym ádklöüfa à had wylda fyglñ. S'mügjys, wi'à zułd roüsfiöen, roümt'à záj planet uf. Atsum ránikt'à dy tjihta wulkana. À hot cwej tjihty wulkana. Dos wiöe ju zjyr práktyś cym koha ufa mügja. À hot oü án štyla wulkan. Oder à ziöet mer: mà kon ni ny wysa. Án'à flás oü dan štyla wulkan. Wen zy güt zájn byflysa, brin zy myld án stájd án zy brähja ny oüs. Dy wulkanabrih zájn wi küminfojer. Uf ynzer planet zájwer ju füt fejł cy klin, do wer zuła dy ynzer wulkana flájsa. Diöh dos ergjyn miswer yns diöh zy.

Myt ábysla dümján rás der Kliny Fjýst s'lecty baobabkroütik oüs. Ejn doüht's, do'à wyt ni ny cyrykkuma. Oder dos tagteglikjy rymgycela wiöe y dam mügja ekstra interesántyś, zu sán's'um. Án wi'à s'Blimla s'lecty möl undergus án'à wułd's myt ár głyzerä głok cüdekja, ej'um der grájn y dy oüga án ys hac kuma.

– Ław güt – ziöet'à cym Blimla.

Oder ejs mält zih ny.

– Ław güt – ziöet'à wejder.

S'blimla hüst uf. Oder s'wiöe ny diöh ferkilnan.

– Yhy wiöe duł – ziöet's endlík – Byt šejn, fercáj mer. Priöebjy gyłyklik cy zájn.

Ejn hot's à wunder, do's cünum kà frejwuł ny hot. Ganc jer bła'á mytum głozkrigla štejn. Oder do's zu myld án gyhałda wiöe, bygráf' à ny.

– Ju, yh ho dih łiw – ziöet s'blimla – Dü kundst's ny wysa, dos bej yhy šylik. S'ej ju oder ny wihtik. Dy wiöest ázu duł wi yhy. Priöebjy gyłyklik cy zájn. Łö dos głozkrigla. Yh wył's ny mej.

– Oder der wynd.



– Yhy bej ny ázu fest ferkilt, do... dy kiły nahtlöft wyt mer ufs güty kuma. Yhy bej ju á blimla.

– Oder dy fihjyn...

– Yhy wa mer ju müsa myt cwü oba dráj roüpa röt gan, do'h dy mulkjadrýmułn kena ījy. Dos wyt ju šejn zájn. Bo zyst, to war wje mih byzihja? Dy wyst ju wájt zájn. Fjyn grusa fihjyn fjet yh mih ny. Yhy ho ju máj pazyrym.

Wi cyfloty wáz's záj fjyr djenyn, à nöhta ziöet's cü:

– No mah's ny zu ḥang, dos ej ju okriöepnik. Dö höst ju oüsgykłoüt cy gejn, do gejze! Ejs wułd ny do'a's grenn zit. Ejs wiöe zjyr á štułc blimla.

X

S'WIÖE JU NÖND fun asteroida 325, 326, 327, 329 án 330. Å füng o zy cy byzihja. Å wułd zih myt yhta ejwernama án yhta ījyn.

Dy jyšty planet bywönt á kyng. Der Kyng fłoćt, ganc yr purpür án ym wájsgyfatelapełc ogycün, uf ám zjyr gywynlikja, oder majestetyśa trön.

– Å. Dö ej ju á undertynikjer. – ziöet der kyng, wi'á á Klina Fjyśta derzoh. Der Kliny Fjyśt fret zejh zoüwer: Wi kon'á mih kena, wen'á mih nö áni ámöl ny höt gyzan? Å wöst ny, do dy welt fwy dy kyngja zjyr ḥajht ej án oły loüt zájn fjyr zy undertynikja.

– Ku nynder, do'h dih beser kon zan – ziöet der kyng štułc fu dam, do'a imyd fjyr á kyngja kon hon.

Der Kliny Fjyšt züht án ploc zih cy nejderfloćja, oder dy gancy planet wiöe myt ám eleganta mantuł bydakt. Do blá'á stejn án do's'a šlyfyt, gant'a.

– S'ej à grus ferbrähja, by ám kyngja cy gann – ziöet der kyng.

– Yh ferbit's der.

– Yhy kon ju oder ny andyšt – ziöet'um der Kliny Fjyšt ganc jer – Yh ho łang gyrázta ho ny gyślöfa.

– Yh gybit der y gann – ziöet der kyng – Jünlang hoh nö nimanda ny gann gyzan. Gann ej fjyr mejh zełda. No, śun! Ganze nö ámöł. Dos ej à gyböt!

– Dos tüt mer strah... yh kon ny. –ziöet der Kliny Fjyšt án'a wiöd rut.

– Hm! – reágjyt der Kyng – Do zo's... Yh gybit der, bałd cy gann án miöehysmöł...

À kuzt yhta under noz án'a šan bezj cy zájn. Bo der Kyng wiöe cy dam gywönt, do záj ozan gyśunt wjyd. À ład ká unghüzüümikkájt. À wiöe à absuluter regjyjer. Oder har wiöe zjyr gutwyłnik án'a gyböt fernynftik.

– Wen yh gybit, – ziöet'a gywynlik – Wen yh y ám jenerał gybit, do'a zo à mjerföguł wada, án wen der jenerał ny cühüht, wje dos ny har zájn šylik. Dos wje yhy zájn.

– Kon yh mih nejderfloćja? – fret der Fjyšt śmy.

– Yhy gybit der dos cy maha – ziöet'um der Kyng cyryk án'a cug majestetyś à fałd fu zem wájsgyfatelamantuł cy zehj ácü.

Der Kliny Fjyšt höt oder myt wunder cügyzan. Dy planet wiöe ju klinüćik. Wos kon ym Kyngja dö gyhüt hon?

– Majestet? –ziöet'a – Fercájt mer, do'h'üh fre...

– Yhy gybit'er, mejh cy fren – ziöet'um der Kyng gylik o.

– Majestet... myt wos regjyter?

– Myt ołum.

– Myt ołum?



Der Kyng wáz myter hand dy gancy planet, uf dy ander planeta án uf dy stám.

– Myt dam ołum? – Fret der Kliny Fjýst.

– Myt dam ołum. – málta zih der Kyng.

Bo'á wiöe ny nok à absoluter regjyjer, ok à wiöe oü à uniwersáler regjyjer.



– Ån di štam gyhühja jüh?

– Frálik – ziöet der Kyng – zy gyhühja gryhta. Yhy žajd ká unghüžümkájt.

Zyty maht höt á Klina Fjýsta zjyr scüdát. Wen’á wje hon zyty maht, wje’á ym štand zájn, ny fíjrafjycik, ok gryhta cwejánzymfcik oba nawet hundyt oba giöe cwe hundyt zunaundergeng y ám tag derlawa ána zih áni myt zem symuł ny cöwa! Ån zu tüt’um dos gydenkja fu zer klina, ferlöna planet ábysla bang. Y dam gyfił špüt’á zih öusgyhułfa, á Kyng ym derbiöemnan cy byta.

– Yhy wje weđa zu gan á zunaundergang zan. Derbiöemt’uh žé, gybit yr zun cy undergejn...

– Wen yh y ám jenerał gybit, fu ám blímła ufs ander wi á mulkjadrymuł cy fligja oba á tragedyj cy śrájwa oba á mjerfoguł cy wada, án wen der jenerał máj gyböt ny fulgt, war wje zájn dos sylik, har oba yh?

– Dos wjet jyr zájn sylik – ziöet der Kliny Fjýst decydjyt.

– Wirklih wur. Wer müsa y idum dos häsa, wo’á sofa kon – ziöet der Kyng – Autorytet ej ym jyšta dy fernunft. Wen dy den loüta häst, do zy zih ys mjer wafa, wan zy der cy trüç ata. Yh ho dos ráht, gyhüžumkájt cy krigja, bo máj gyböta zájn fernynftik.

– Åzu wos wyt zájn myt mem zunaundergang? – underziöet’um der Kliny Fjýst, wo’á ni ká frög ny fergos, wi’á zy sun ámöł hot gystełt.

– Dy zułst den zunaundergang hon. Yhy wa’s gybita. Oder yhy wa y mer gýsajtikkájt oüz regjyjer hiöera, wál dy nawazaha cy dam tejgja.

– Wen wyt dos zájn? – wułd der Kliny Fjýst wysa.

– No... – ziöet’um der Kyng cyryk án’á zoh by dam y ám grusa kalender cü – Hm, dos wyt zájn... s’wyt hoüt s’öwyts zu

- cwencik fgyr aht zájn! Do konsty zan, wi's mer gyhüht wjyd.
- Der Kliny Fgyt gant. S'wiöe jum ład à zunaundergang cy ferzoüma. Án ejm wiöe's sun ábysla bang.
- Yhy ho dö nist mej ny cy tün – ziöet'á ym Kyngja – Yhy fiöe wág.
- Blaj – ziöet der Kyng, wo'á fu dam štułc wiöe, do'á gükja án undertön kund hon. – Gej ny, yhy mah dih á minister!
- Minister fu wos?
- Fur... gyrähtikkájt.
- Oder dö ej nimand, wan'á ryhta wje kyna!
- Dos wyswer ny – mält zih der Kyng – Yhy ho nö ni diöh maj krüland ny gyräzt. Yhy bej ju zjyr ołd, yhy ho ká ploc cy kückjyn án s'rymgejn wje mih ejwermynikja.
- O! Oder yhy ho sun gyzan – ziöet der Kliny Fgyt án'á dryt zih ym, do'á nö ámöł zo uf dy ander zájt fur planet söha – S'ej diöt nimyd.
- Ázu müsty dejh zoüwer ryhta – ziöet der Kyng – Dos ej s'swjersty. S'ej ju fejl swjener zehz zoüwer cy ryhta, owi dy ander łout cy ütála. Wen dy's wást, dejh zoüwer gyräht cy traktjyn, do bysty wür gyśájt.
- Yhy kon mejh zoüwer byütála, giörás, wun yh bej. Yhy mü ju dö ny blajn.
- Ju ná! – ziöet der Kyng – Yhy mán, do's uf mer planet jynt á rot gyt. Yhy hgy zy s'nahts grasjyn. Dü kyndst di ołdy rot ryhta. Dy konst zy ámöł uf dy cajt uf tutströf byütála. Do wyt jyr ława uf der gyrähtikkájt lejgja. Oder dü wyst zy idys möł misa bygnedikja, do zy ny fergejt. S'gýt jok ány.
- Yh – ziöet der Kliny Fgyt cyryk – Yhy wje nimanda ufa tut ferütála, án yh myht sun gejn.
- Ná – ziöet der Kyng.
- Der Kliny Fgyt hot sun ogýfanga cy gejn, oder á wułd füt

ny, do's ym ołda Kyngja ład wje zájn.

– Wen ojer majestet uf gyhüzümkájt öbaht gyt, kynter mer à fernynftik gyböt gan. Der kynt mer cym bájspil gybita, do'h'üh y ár minüt ferlon zo. Mehtings, do dy bydingnisa fjyr oüh wuwuł zájn.

Der Kyng mält zih ny án der Kliny Fjyšt zoümt cyderjyšt, oder nöht'á underbroh'á myt ám derzyfta.

– Yhy mah fu djyr men böta – rüfum der Kyng gylik ánöh. Zu höt'á à grusa sájn fu zem ozan bywjet.

– Dy grusa łouł zájn zjyr wyndelik – medytjyt'um der Kliny Fjyšt uf zer ráz.

XI

UFER ANDYN PLANET ławt à Pyfuł.

– Å, et byziht mih à ɿphober! – rüf à sun fu wájtum, wi' à jok à Klina Fjyšt kuma derzoh.

Bo fwy dy pyfułn zájn dy ander ɿöt jyr ɿphobyn.

– Skiöekumt – ziöet der Kliny Fjyšt – Der hot à fajna hüt.

– Å ej cym bygrisa –
ziöet'um der Pyfuł –
Å ej cym grisa, wen
mer dy ɿöt kösta. Oder
ungyłyklik gejt dö ni-
mand ferhejn.

– Fwy dy wür? –ziöet
der Kliny Fjyšt, wo' à fu
dam ganc duł wiöe.

– Köst myta henda –
ziöet'um der Pyfuł.

– Der Kliny Fjyšt höt
myt zen henda gyköst.
Der Pyfuł grist gyhałda
mytum cügynágta hiët
àn' à cug zen kapelüshüt
ro.

– Dos ej ju hamlikjer wi
máj byzüh bym Kyngja
– stüdjyt'um der Kliny
Fjyšt. Åzu köst' à ufs



nojy myta henda. Der Pyfuł cug zen hüt fum hiöet ro, do'á zo grisa. Nö fynf minüta fu dam iba wiöd ym Klina Fjyśta dos ánfahtikjy śpejł bang.

– Án do der hüt fełt – fret'á – wos djef'á maha?

Oder der Pyfuł höt'á ferhüt. Dy pyfułn weļa nok gyłöwt wada.

– Bywundysty mejh wirklih wür zjyr? – fret'á á Klina Fjyśta.

– Wos häst dos “bywundyn”?

– Bywundyn häst derkena, do'h der besty kłop, der ym besta ogycüny, der rehsty án der inteligentsty ufer wełt bej.

– Oder dy byst füt áłan uf der planet.

– Mah mer di frájd án bywunder mih nö!

– Yhy bywunder dih – ziöet der Kliny Fjyśt án'á śtytułt nok myt zen aksułn ábysła – Oder fyrym ys's fjyr dejh ázu wihtik? Do ferśwund der Kliny Fjyśt.

– Dy grusa łoüt zájn fgy dy wür zjyr hejwyšt. – ziöet'á jum uf zer ráz.



XII

UFER ANDYN PLANET ławt à Łoper. Záj byzüh wiöe ju zjyr kück, oder s'maht à Klina Fjyśta füt trüwenik.

– Wos mahsty dö? – ziöet'um der Łoper, wyła'á štyłnik fyr ár ráj fun łydikja án ár ráj fun fuła floša zyca fund.

– Yhy šep – ziöet'um der Łoper mytum fynstyn gzyht.

– Án fyrym šepsty? – fret der Kliny Fjyśt.

- Do'h zo fergasa – ziöet'um der Łoper.
- Wos wyłsty fergasa? – fret der Kliny Fjyśt, wo's'um śun ład ymá wiöe.
- Yh wył fergasa, do'h mih śam – ziöet'um der Łoper án'à ḥis záj hiöet runderhengja.
- Wos śamsty dih? – fret der Kliny Fjyśt gydyłdik weter, wáł'a jum wułd hyłfa.
- Yhy śam mih, do'h śep – ziöet der Łoper kárlect án'à zunk y à tif swájgja.

XIII

DY FJYDY PLANET gyhüt y ám koüfmon. Dar kłop wiöe zu cyat, do'a giöe ka ufzan ny höt gynaht, wi der Kliny Fjyśt wiöe kuma.

- Skiöekumt – ziöet der Kliny Fjyśt – Ojer papjerös ej oüs.
- Dráj án cwe ej fynf. Fynf án zejwa ej cwełf. Cwełf án dráj ej fumfca. Skiöekumt. Fumfca án zejwa ej cwejáncwencik. Cwejáncwencik án záhs ej ahtáncwencik. Ká cájt, ejn wejder ocycynda. Záhsáncwencik án fynf ej ánandresik. Ojeruma! Dos ej fynfhundyt milon záhhundyt cwejáncwencik toüzyt zejhundyt ánandresik.
- Fynf hundyt milona wos?
- Wos? Bysty nö dö? Fynfhundyt milon... Yh ho's fergasa. Yhy ho zöfuł at! Yhy ziöe dos wür, myt ká kynderája kon yh ká cah ny hałda! Cwe án fynf ej zejwa...
- Fynfhundyt milon wos? – ziöet der Kliny Fjyśt wejder, wo'a nymer y zem ława ká frög ny hot fergasa, wen'a zy śun ufgystełt höt.

Do hüw der Koüfmon záj hiöet uf:



– Šun fjyránfunfcik jür, wi’h uf dar planer þaw, höt’á mer nok cwe möl ferhyndyt. S’jyšty möl wiöe’s cwejáncwencik jür y dam á kkyfer, wo’á fu warás-wun gyflöga kom. Á brumt okriöepnje án yhy jert mih bym rähyn. S’ander möl wiöe’s álf jür y dam, do krigt yh s’rymatyšy. Yhy kund mih mej ny rjyn. Mjyr fałt cajt ufs rymzoüma. Yhy bej á gyzecter menć, bej’h. S’dryty möl... ej yta! Yhy ziöet fynfhundyt milon...

- Fynfhundyt milon fu wos?
- Der Koüfmon kom uf dos, do'á mej uf záj rü ny kon höfa.
- Milon fu dan klina zaha, di wer miöehysmöł zan ufum hymuł.
- Fligja?
- Ná, dy klina zaha, wo glanca.
- Byn?
- Frálik, do ny. Klinüćikjy gyldera zaha, di łön dy foülcyn à tag fertroüma. Oder yhy bej à gyzecter menć, bej'h! Yhy ho kà cájt ufs triöema.
- Á, dy štam!
- Ju, dy štam.
- Án wos wyłsty myt dan fynfhundyt milon štam ofanga?
- Fynfhundyt milon záhshundytcwejáncwencik toüzyt, zejhahundytánandresik. Yhy bej à gyzecter menć, yhy bej dos ákurat.
- Án wos wyłsty myt dan štam maha?
- Wo yh myta maha kon?
- Ju.
- Nist. Yhy ho zy.
- Dy štam gyhjyn y djyr?
- Ju, frálik.
- Oder yhy ken án Kyngja, wo...
- Dy kyngja hon nist. Zy regjyn ok myt dam. Dos ej yhta ganc andyśtys.
- Án wos wejwułt dos, štam cy hon?
- Zy maha mih rájh.
- Án wos brengt der dar rájhtüm?
- Yhy kon ander štam kiöefa, wen zy wada gyfunda.
- Á ej ábysła wi der Łoper – medytjyt'um der Kliny Fjyśt. Á höt oder nö lang ny ołys gyfret, wo'á wułd.

- Wi kon mà štam hon?
- Y wam ghyjyn zy? – śnürt der Koüfmon o.
- Yhy wà nist. Y àm menća.
- No do ghyjyn zy y mjyr, bo yhy bej öz der jyšty uf dos kuma.
- Dos ej gynüg?
- Àn zu. Wen dy à djemyt fyndst, wo’ à nimanda’s ej, ghyjyt’ à y djyr. Wen dy à ynzul öusmytułst, wo’ à y nimanda ny ghyjyt, do ghyjyt’ à y djyr. Wen dy uf yhta öz der jyšty byst kuma àn dy patentjyst dos, do ghyjyt’s y djyr. Àn yhy ho dy štam, bo nimyd wiëe fýr mer uf dos kuma, zej cy hon.
- Dos ej wür – ziöet’um der Kliny Fjyšt – Àn wos mahsty myta?
- Yhy wjytſoft myta. Yhy ráher zy àn ráher wo à wájl – ziöet der Koüfmon. – Dos ej ju zjyr śwjer, oder yhy bej à gyzecter menć.

Der Kliny Fjyšt wiëe oder byštenik nö ny cyfrejd.

- Wen yh à zájdatihla ho, do kon yh mih ymkyca mytum àn’ à myt mer mytnama. Wen yh à blimla za àn rájs’s, do kon yh’s myt mer mytnama. Oder štam kon’ à ny roràjsa!
- Nà, oder mà kon zy yn bank gan.
- Wos hást dos?
- Dos hást, do’h à wat fu men štam uf àm cyduł ufšrájw. À nöhta šlis yh dos cydeła mytum šlysuł yr šüflod.
- Dos ej ołys?
- Dos glengt ju.
- Dos ej fajn – medytjyt’um der Kliny Fjyšt – Dos ej ju zugioë poetryś. Oder gyzect ej dos ny. Der Kliny Fjyšt höt’um ganc andyštys öz gyzect fürgystełt, wi dy gydanka fun grusa łoüt.
- Yh – ziöet’ à nö àmöl – yhy ho mój blimla, wo yh’s ida tag undergis. Yhy ho dráj wulkana àn idy woh bykje yh zy. Yhjy

bykje zugioe á štyla wulkan. Má kon ju ni ny wysa. S'ej güt fjyr máj wulkana án oü güt fij máj blímł, do'h zy ho. Oder dü byst yn stam giöe ny nejtlik.

Do maht der Koüfmon s'moülf uf, oder á kund ká átkánwüt uf dos ny fynda, án der Kliny Fjyšt wiöe ferśwunda.

– Dy grusa łoučt zájn fij dy wür zjyr hejwyšt – ziöet'á ufer ráz cy zejh zoüwer.

XIV

DY FYNFTY PLANET wiöe oü zjyr wyndelik. Dos wiöe dy klinsty planet fu ola. Zy wiöe grod gynüg grus uf á łotaryhla án uf án nahtwahter. Der Kliny Fjyšt kund uf dos ny kuma, cy wos ej jynt ufum hymuł, uf ár planet ony ká gyboüd án ony łoučt, á łotaryhla án á nahtwahter nejtlik. Oder á höt'um gyśtudjyt ym hiöet:

– Fylájht höt dar klop án štejh. Oder fylájht á klályn wi der Kyng, der Pyfuł, der Koüfmon án der Łoper. Záj at höt jynt án zin. Wen'a záj łotaryhla ocynt, ej dos, wi wen'a án noja stam usbrengt oba á blímł. Wen'a záj klin łotaryhla felešt, wigt'á s'blimł oba á stam cym šlöf. Dos ej á šejn byruf. Dos ej fij dy wür zjyr nejtlik, bo s'ej šejn.

Wi'a uf dy planet kom, bygrist'á á nahtwahter myt grusum ájzan.

– Skiöekumt. Fyrym hösty grod s'łotaryhla felešt?

– Dos ej á zyta öernung – ziöet der nahtwahter – Güter mügja.

– Wos hást dos?

– Dos hást, máj łotaryhla cy feleša. Güter öwyrt.

Do cund'á's wejder o.

- Án fyrym hösty zy wejder ufs nojy ogycunda?
- Dos ej á zyta öernung – ziöet der nahtwahter ufs nojy.
- Dos ferstej yh ny – ziöet der kliny Fjyšt.
- Dö ej ju nist ny cym ferstejn – ziöet der nahtwahter –

À öernung ej á öernung. Güter mügja.

Án'á hot s'łotaryhłा felośa.

Nö dam wöst'á jum dy stjyn myt ám ruta śnüptihłा.

– Yhy ho á stråsnikjy at. Ámöl wiöe zy ju fernynftik. Yhy cund s'łotaryhłा s'mügjys o án yh feloś zy s'öwyts. S'lecty fum tag hot yh fráj án s'lecty fur naht kund yh ślöfa...

- Wos ej fu derzynt yr öernung andyšt gywiöda?
- Dy öernung ej ny andyšt gywiöda – ziöet der nahtwahter
- Dos ej ju di kistiöeryj! Dy planet füng o idys jür byhenderer cy dryn, án dy öernung ej ázu gybłejn.

– Án? – ziöet der Kliny Fjyšt.

– Án eta maht zy idy minüt á rod, yhy kon áni á sekund ny rün. Yhy dry mih ámöl y ár minüt.

– Dos ej fajn! À tag toüyt by djyr á minüt!

– Dos ej ny fajn – ziöet der nahtwahter – Wjyr kuza śun cyzoma á mönda łang.

– Á mönda?

– Ju, füt. Dresik minüta. Dresik tag! Güter öwyt.

Án'á cund śun s'łotaryhłा wejder o.

Der Kliny Fjyšt zoh'um byr at cü. Á hot gan dan nahtwahter, wo'á zu praw záj öernung oüswejwułt. Á gydöht fun zunaundergeng, wi'á'á zoüwer jyśter cügyśoüt hot, wi'á zen symuł köwt. Á wułd y zem frajnd hyłfa:

– Wästy... yhy wás á mytuł, wi dy rün konst, wen dy nok wyłst...

– Yhy wył inda – ziöet der nahtwahter.



Bo má kon zájn praw án foüł uf ámöl.

Der Kliny Fjyšt kuzt weter:

– Dáj planet ej ázu klin, do dy dráj möl śrájtst án dy gejst
zy diöh. Dy müst nok gynüg ámałik gejn, do dy inda ufer zun
blájst. Wen dy rün wyłst, do gejsty gywynlik... án der tag
toüyt zu łang, wi dy wyłst.

– Dos ej ju ny ekstra gyśajt – ziöet der nahtwahter – Bo yh
ħiw à šlöf.

– No do dos ej ony zin – ziöet der Kliny Fjyšt.

– S’ej ony zin. – ziöet der nahtwahter – Güter mügja.

Do feloš’ā wejder s’łotaryhħla.

Jen – ziöet der Kliny Fjyšt, wi’ā weter rázt –Wjyn dy oħla
ander fjyr nist hon, der Kyng, der Pyfuł, der Łoper án der
Koūfmon. Oder dos ej der áncikjy, wo mer ny ej īħawat.
Fylájht diöh dos, do’ā denkt fu andyn zaha wi fu zejh zoüwer.

À höt ámöl myt bydoüyn derzyft án’ā medytjyt nö:

„Jer wje zájn dar ány, fu wyła yh mer à gyśpon het gymaht.
Oder záj planet ej fij dy wür zjyr klin. Dö ej kā ploc fjyr yns
cwej.”

Myt wos zih der Kliny Fjyšt ny wułd īön kena: à grān y dar
gyzánta planet ánöh, ym másta diöh di toüzytfjyrhundytfjycik
zunaundergeng y fijrāncwencik štunda!

XV

DY ZÁHSTY PLANET wiöe can möl gryser. Diöt ławt à ołder klop, wo' à ogriöemnikjy bihla śráw.

– Zejh jok. Dö kymt à oüsmytułer! – ziöet' à, wi' à à Kliny Fjyśta derzoh.

Der Kliny Fjyśt fłoćt zih uf án tejś nejder án' à rüt ábysła. À hot śun à łanga wág hynder zejh gyhot!

– Fu wu kymsty – wułd wysa der ołdy klop.

– Wosfer à grów bihla ej dos? – ziöet der Kliny Fjyśt – Wos mahter dö?

– Yhy bej à Geografer – ziöet der ołdy klop.

– Wos ej dos, à geografer?

– Dos ej à gyłyter, wo oły mjer, flys, štytyn, gybjygja án wistája kent.

– Dos ej ju interesántyś – ziöet der Kliny Fjyśt – Dos ej endlik à würik byruf. À zoh uf dy planet fum Geografer. À hot nö ni ká zyty hypišy planet gyzan.

– Zy ej ju zjyr śejn, ojer planet. Gyt's dö oü oceana?

– Dos wás yh ny – ziöet der Geografer.

– Ah – (der Kliny Fjyśt wiöe ferziöet) – Án gybjygja?

– Dos kon yh ju oü ny wysa. – ziöet der Geografer.

– Án štytyn án flys án wistája?

– Dos kon yh ju oü ny wysa. – ziöet der Geografer.

– Oder jyr zájt füt oder à geografer!

– Dos ej wür. – ziöet der Geografer – Oder yhy bej ká oüsmytułer. Mjyr fała d y oüsmytułyn zjyr. Der geografer gejt ká štytyn, flys, tājhja, mjer án wistája ráhyn. Der geografer ej



cy wihtik, do'á zo diöh dy wełt štrapecjyn. Å gejt fu zem bjüro ni ny roüs. Oder à nyamt uf dy oüsmytułyń. Å fret zy diöh ân'â śrąjwt jyr gydanka uf. An wen's'â jyr gydanka wažnik dynkja, to nyamt zih der geografer Cyr karakterfüšnan fum oüsmytułer.

– Fyrym?

– Wål à oüsmytułer, wo łougjyt, à rofoł diöh dy geografyj-bihła cybráta kon. Oü zu wi à oüsmytułer, wo jum gan oüstrynk.

– Fyrym? – fret der Kliny Fjyšt.

– Bo dy łopyn zan cwejfáhtik. Der geografer wje cwe gybjygja ufcáhułn, wu's nok ás go.

– Yhy ken imanda – ziöet der Kliny Fjyšt – Wo’à à šláhter öüsmytułer wje zájn.

– S’kon mejglik zájn. Wen oder der karakter fu ám öüsmytułer özgüt derfüst wjyd, do kon mà zen öüsgymytułta płoc derfüşa.

– Gejt mà’s ośoün?

– Nà. Dos wje zájn cy śwjer. Oder fu ám öüsmytułer wył mà, do’à bywájza mytbrengt. Wen’à cym bájśpil à grus gybjyg öüsgymytułt hót, ferlangt mà, do’à grusy stán wájzt.

Do tüś zih der Geografer endlik rjyn...

– Oder dü kymst ju fur welt! Dy bist à öüsmytułer! Dy wyst mer daj planet bysrájwa!

Wi der Geografer sun zen rájster ufgymaht hot, šlaf’ à záj blájstift o. Cyderjyšt śrajwt mà dy gyšihta fu ám öüsmytułer myt ám blájstift. Zy wan śpyter mytum inkoüst ferbesyt, wen der öüsmytułer bywájza mytbrengt.

– An? – fret der Geografer.

– O! By mjyr dyham – ziöet der Kliny Fjyšt – Ys’s ny ázu interesántyś, s’ej ju zjyr klin. Yhy ho dráj wulkana. Cwej tjuhta an an fełośan. Oder mà kon ni ny wysa.

– Må kon ni ny wysa – ziöet der Geografer.

– Yhy ho à blimła.

– Wjyr śrajwa kà blimła ny uf – ziöet der Geografer.

– Fyrym ny? Zy zájn s’synsty!

– Wájł dy blimła ferhejnlik zájn.

– Wos hást dos „ferhejnlik”?

– Dy geografyjbihla – ziöet der Geografer – Zájn dy watsta fu oła bihla. Zy wada ni ny ołd. S’gyşjyt ju zjyr wing, do à gybjyg zih wje cöwa. S’gyşjyt ju oü wing, do à ocean öüstroügt. Wjyr śrajwa nok ywikjy zaha uf.

– Oder dy štyla wulkana kyna ju füt tjuht wada –

underbroh'um der Kliny Fjyšt – Wos häst dos „ferhejnlik”?

– Op wulkana štył zájn oba ny, ys's fjyr yns giöerås. – ziöet der Geografer – Wo yns interesjyt, ej s'gybjyg. Dos wjyd ny andyšt.

– Oder wos häst dos „ferhejnlik” – ziöet wejder der Kliny Fjyšt, wo'á y zem ława ni ká frög ny uflis, wen'á zy śun ufgystełt hot.

– S'häst, do's „bałd ferhejngejn myht”.

– Myht à bliimla bałd ferhejngejn?

– Frálik.


– Mái bliimla ej ferhejnlik – ziöet der Kliny Fjyšt cy zejh zoüwer – Án ejs höt nok fjyr djenyn, do's zih zo fur wełt bywjen. Án yh lis's áłan dyham zájn.

Dos möl höt'á s'łád s'jyšty möl byrüt. Oder á hiłd küráž:

– Wos röter mer, wos zuł yh byzihja? – fret'á.

– Dy planet Ad – ziöet'um der Geografer cyryk – Zy štejt ju ym zoc.

Án der Kliny Fjyšt ging weter án'á döht fu zem bliimla.



XVI

ĀZU WIÖE DY zejwdy planet dy Ad.

Dy Ad ej kā gywynlīkky planet ny. S'għit diöt hundyt ālf kyngja (mà djef fun kyngja y Afryk ju ny fergasa), zejwa toüzyt geografyn, noünħundyttoüzyt koüfloüt, zejwānhołp milon ɭopyn àn drájhundyt ālf milon pyfułn, oħys cyzoma yma cwe milárdha grusy ɭoüt.

Do'h'üh zo dy grys fur Ad fürlen, wył yh'üh ziöen, do's wàl zy s'liht hon derfunda, diöfta zy hon à armyj fu fjährhundyt cwejanzähciktoüzyt fynfhundyt ālf nahtwahtyn uf oħra záhs grusynzułn.

Fu wájtum, hot's à fajna efekt gan. S'wymułn fu dar armyj wiöe orgánizjyt wi y ám operbalet. Cyderjyśt köma dy nahtwahtyn fu Noüzeland àn Oüstrálijen. Wi zy sun jyr ɭotaryhla hota ogycunda, gingja zy šlöfa. Dy ander tancgráċa derwejwułta dy nahtwahtyn fu Xina àn Syberyj. Oü zej hon zih hynder bejn hejngylet. Nö dam go's dy nahtwahtyn fu Rüsland àn Indja. Nöhsta dy fu Afryk àn Yħrop. Nöhsta di fu Mytag-Ameryk. Nöhsta di fu Hołwanaħt-Ameryk. Àn zy jerta zih nymer ny y dar öernung, wi zy zih ánöhpojawjáta. Dos wiöe ju öetik.

Nok dar fumlotaryhla ym Nordpol àn záj kameröd fumlotaryhla ym Zidpol hon yr foülyt àn nistmaha gyławt. Zy hon ju nok cwe jür ufs jür gyat.

XVII

WEN MĀ UF án gyśájta oüskuma wył, łouigkeit mā oü by dam miöehysmöł. Yhy wiöe ju ny ganc gyhałda, wi'h'üh fun nahtwahtyn derycylt. Yhy kynd y oła, wo zy dy ynzer planet ny kena, zej wełyś fürsteła. Dy łoüt djefa hon ok wing płoc ufer Ad. Wen dy cwej milárd łoüt, wo zy uf dar Ad ława, zih ábysła cyzomadrengja wjyn, wi uf ár müzik, do wjyn zy y à płon nájkyna, wo'á cwencik májln łang án cwencik májln brát wje zájn. Mā wje dy gancy łoütsoft ufum klinsta ynzul y Pacific cyzomadrengja kyna.

Frálik, do dy grusa łoüt wan's ju ny gliöen. Zy nama'á cü, do zy hefa płoc djefa hon. Zy hon zih fyr zu wihtik wi dy baobaba. Ma dzyft'á cüröta, do zy zuwos ráhyn. Zy liwa dy cifyn, dos wyt'á gyfoła. Oder jyr zułt ojer cájt uf zyty ibnan ny cübrengja. S'höt ju kà zin. Gliöet mer že.

Wi der Kliny Fjyśt uf dy Ad kom, scüdát'á, do'á nimanda ny derzoh. Á hot šun strah, do'á uf à śláhty planet gyfiöen kom, wi zih á šlyng yr möndafioerw ejwum zand rüt.

- Güter öwyty – ziöet der Kliny Fjyśt mił.
- Güter öwyty – ziöet dy yter.
- Uf wyły planet ho yhy gytrofa? – fret der Kliny Fjyśt.
- Uf dy Ad, y Afryk – ziöet dy yter.
- Oh! Gyt's nimandaufér Ad?
- Dö ej dy wistaj. S'zájn kà łoüt ufer wistaj ny. Dy Ad ej grus. – ziöet dy yter.

Der Kliny Fjyśt fłoćt zih uf à štan nejder án'á šoüt ufa hymuł:

- Yh fre mih – ziöet'á – Op dy štam šájnn, do ider zen ágjan

ámöl wejderfynda kon. Šou der o uf máj planet, zy blájt ju grod ejwer yns štejn... oder zy ej ju zjyr wájt!

– Zy ej šejn – ziöet dy yter – Cy wos bysty dö kuma?

– Yh ho umštend myt ám blimla – ziöet der Kliny Fjyšt.

– Áh! – ziöet dy yter.

Àn zej blyn štył zycia.

– Wu zájn dy łoüt? – füng der Kliny Fjyšt wejder o cy kuza

– S’ej ju álánik ufer wistaj.

– Oü undyn łoüt ys’s álánik – ziöet dy yter.

Der Kliny Fjyšt šoüt’er łangy cajt cü.

– Dy byst ju á łahawat fi – ziöet’á endlík – Fyngjergröp.

– Oder yhy ho mejer maht wi der fyngjer fu ám kyngja. – ziöet dy yter.

Der Kliny Fjyšt łahit cü.

– Dy höst ju ny hefa maht... Dy höst ju áni ká fis...

Dy konst ju áni ny rymráza.

– Yhy kon dih weter brengja wi á šejf – ziöet dy yter.

Zy šlung zih ym Kliny Fjyšta’s knyhuł wi á gyldera pulsvermer.

– Wan yh ok byrjy, dan ga’h y dar ad cyryk, fu wyler’á roüskuma ej. – ziöet zy nö – Oder dü byst rán, dy byst fu ám štam kuma...


Der Kliny Fjyšt málta zih ny.

– Mjyr ys’s ład ym dejh, uf dar Ad fum granit, bo dy byst zu swáhúšik. Yhy kon der ámöl hyłfa, wen’s der ład ym dái planet ej. Yh kon...

– Oh! Yhy ho’s zjyr güt bygryfa. – ziöet der Kliny Fjyšt – Oder fyrym kuzty byštenik wi hiöetgybráh?

– Yhy ku uf zy oły.

Àn zej blyn štył zycia.



XVIII

DER KLINY FJYŚT śtrápecjyt dy wistaj diöh án'á bygánt nok y ám blimla. Å blimla myt dráj bilitapłacła, å šiliöegik blimla...

- Skiöekumt – ziöet der Kliny Fjyśt.
- Skiöekumt – ziöet s'blimla.
- Wu zájn dy łoüt? – fret der Kliny Fjyśt fürnym.
S'blimla zoh ámöł á karawancug ferheinkuma.
- Dy łoüt? S'zájn, dynkt's mih, záhs oba zejwa. Yhy zoh zy å piöer jür y dam. Oder å kon ju ny wysa, wu má zy kon fynda. Der wynd wyt cy rym. Zy hon ká wücułn, dos ferhyndyt'å zjyr.
- Güt noma – ziöet der Kliny Fjyśt.
- Güt noma – ziöet s'blimla.

XIX

DER KLINY FJÝŠT štág uf à grus gybjyg. Dy ána gybjygja, wo'á wöst cy kena, wün dy dráj wulkana, di jum nok dy knija derkrigta. Án à styła wulkan nytikt'á oüz án symuł. – Fu ám zu huha gybjyg wi dos – ziöet'á cy zejh zoüwer – kon y ám oügabłyk dy gancy planet án dy gancy łouťsoft osoün... – Oder à zoh ju nist mejer ny owi güt ogyslyfagrusztancynk.

– Skiöekumt – ziöet'á mił.


– Skiöekumt... skiöekumt...skiöekumt... – sólt's'um cyryk.

– War bysty? –fret der Kliny Fjyśt.

– War bysty... War
bysty.... War bysty –
sólt's'um cyryk.

– Zájtze máj
gyšpona, yhy bej áłan
– ziöet'á.

– Yhy bej áłan...
Yhy bej áłan... Yhy
bej áłan... – sólt's
cyryk.



– Wosfer à śmyśniky planet – medytjyt’á jum – ołys ej dyr, fuł fun gybjygjacinkja án giöe gyzałca. Án dy łoüt zájn ju nist ny fantastycnik. Zy kuza dos ánoch, wo’á’á ziöet... Dyham hot yh à blimła: Ejs wiöe inda s’jyśty...

XX

ODER S'EJ GYŚAN, do der Kliny Fjyśt, nö dam wi’á wiöe łang diöh zand, grusztán án śnej strápecjyt, kom’á endlik ufa wág.

Án oły strösa fjyn cyn hoüt.

– Skiöekumt – ziöet’á.

S’wiöe à gatla, ájgyblit myt ruza.

– Skiöekumt – ziöeta dy ruza.

Der Kliny Fjyśt obserwujt zy. Zy zöha akurat zu oüs wi záj Blimła.

– War zájter? – fret’á zy scüdát.

– Wer zájn ruza. – ziöeta dy ruza.


– Á – ziöet der Kliny Fjyśt.

Do śpüt’á zih zjyr ungyłyklik. Záj Blimła höt’um dercyłt, do’s áłan zyty ufer wełt ej. Án dö go’s fynf toüzyt zyty y ám gatla, wo zy oły ufys amsta.

– Ejs wje zih ju dercjyna – ziöet’á – wen’s’á dö wje zan... S’wje ju hefa hüsta án zu maha, wis’s starwa wje müsa, do’s zih ny zełd lön oüsłaha. Án yhy wje mih müsa hynderwajz ymys kymyn, bo zyst wje’s starwa, nok mejh rocyzeca.

Do ziöet’á nö: Mejh doühts, do’h bej rájh myt ám áncikja Blimła, oder yh ho nok à gywynlikjy ruz. Zej án máj dráj wulkana, di mer giöe s’kni ny derkrigja, fu dan áner fylajht uf





inda štył blájt, dos maht fön mer kán grusa fýsta... – à let zih
nejder ufs groz án’á grán.

XXI

DO KOM UF ámöł der Föks.

- Skiöekumt – ziöet der Föks.
- Skiöekumt – ziöet der Kliny Fýst fürnym cyryk, à zoh zih
ym, oder à kund ju nist ny derzan.
- Yhy bej dö – ziöet dy štym under ám epuļboüm.
- War bysty? – fret der Kliny Fýst – Dy byst ju zjyr šejn.
- Yhy bej á föks – ziöet der Föks.
- Kuže án báwjá dih že myt mer – bot der Kliny Fýst o –
Yhy bej ázu troürik...

– Yhy kon zih myt der ny báwján – ziöet der Föks – Yhy
bej ny com.

– Å! Fercáj – ziöet der Kliny Fjyšt.

Wi’á’s sun kück diöhstüdjyt hot, ziöet’å nö cü:

– Wos häst dos „cyma”?

– Dü byst ny fu dö – ziöet der Föks – Wos höt dih dö
gybröht?

– Yhy zih löt – ziöet der Kliny Fjyšt – wos häst dos „cyma”?


– Dy löt – ziöet der Föks – zy hon s’gywer ån zy jiöen. Dos
ej ju štympelik! Zy hałda oü hinyn. Dos ej jyr áncik gyseft.
Zihsty hinyn?

– Nà – ziöet der Kliny Fjyšt – Yhy zih gyšpona. Wos häst
dos „cyma”?

– Dos blajt ju hefa möl ferzan – ziöet der Föks – Dos häst
„troü áner myt andum wada...”

– Troü wada?

– Frälik – ziöet der Föks – Dü byst ju fjyr mejh jok å kliner
büw, å kliner büw wi hundyt toüzyt ander kliny büwa. Yhy



djef dejh ny hon. Ån dü djefst mejh oü ny hon. Yhy bej ju fjyr dejh jok à föks fun hundyt toüzyt föksa. Oder wen dy mih cymst, do wawer yns áner à andyn djefa hon. Dü wjydst fjyr mejh ju bisáncikufer ganca welt. Ån yhy wad fjyr dejh bisáncik ufer ganca welt.

– Yhy ku uf dos štüfawájz – ziöet der Kliny Fjyšt – Do s’ej à Blímla... yh medytjy, ejs höt mih com gymaht.

– S’kon ju mejglik zájn – ziöet der Föks – Ufer Ad kynwer ołys mejglikjy öüsmytułn.

– O! Dos ej ju ny ufer Ad – ziöet der Kliny Fjyšt.

À Föks hot dos ejwernuma:

– Uf ár andyn planet?

– Ju.

– Gyt’s uf dar planet jegjyn?

– Ná.

– Dos ej interesántyś! Ån hinyn?

– Ná

– Nist kon ny zájn idealnik – derzyft der Föks.

Oder à kom cyryk uf dos, wo’à hot ym hiöet ejer:

– Máj ława ej bang. Yhy jiöe hinyn, à dy łoun jiöen mejh. Oły hinyn amsa ufnander ån oły łout zájn ánik. Dos ej mer ábysła bang. Oder wen dy mih cymst, wjyd zih máj ława öusgyhátyn wi dy zun. Yhy wa s’gyrośuł fum śrájta fun andyn underśájda łjyn. Oły ander gráća jiöen mih y máj jam. Daj gráća wan mih wi müzik fu mer jam roüsrüfa. Ån šou der o! Zisty dy wásafaldyn? Yhy as kà brut. Der wás ej mer nistnycik. Dy wásafaldyn brengja mer nist ny ys hiöet. Ån dos ej ju troürík! Oder dü höst gyłdera łöda. Wi wunderšeijn wyt dos zájn, wen dy mih wyst hon gycymt! Der gyłdera wás wyt mer ys hiöet gydanka fu djyr brengja. Ån yh wa s’gyrośuł fum wynd ym wás łiw hon...

Do bławder Föks štył zyca án’á zoh ym Klini Fjyśta łang cü.
– Byt šejn, mah mih com – ziöet’á.

– Dos wje’h ju gan maha – ziöet’um der Kliny Fjyśt cyryk –
oder yhy ho ju ny hefa cájt. Yhy mü ju gyšpona fynda án hefa
zaha ījyn.

– Má bygrájft nok haha, wo má com maht – ziöet der föks
– Dy ħoħut hon ju mej kà cájt ny, zih myt yhta bykant cy maha.
Zy kiöefa ju yn gyweħn oħys fjetik áj. Wali’s ju oder kà gyweħn
myta gyšpona ny għyt, hon dy ħoħut mej kà gyšpona. Wen dy
á gyšpon wyħst hon, do mah mejh com!

– Wos zuł yh maha?

– Dy müst ju zájn gydyldik. – ziöet’um der föks cyryk – dy
wyst dih eta cy mjyr u fum groz cüfleċċja, do dy dih nok ábysla
ohöst fu mjyr. Yhy wa wa uf dih śöha án dű wyst štył zyca.
Spröh dos ej à grusy kwał fun jerana. Oder idha tagħżeq dih żé
ābysla nynder cü...

Do kom ufa andyn tag der Kliny Fjyśt wejder.

– S’het ju beser gywast, wen dy hetst u fum amöl myt mjyr kuma
– ziöet der Föks – Wen dy cym bájspil ym fijr nömytags wjest
kuma, to kon yh sun ym drāj ofanga, gyłyklik cy zájn. Im
mejer dy cájt ácükymt, y dam wad yh gyłyklikjer. Ym fijr
wa’ħi mihi sun derjyhta án unrūķi wada: do derfynd yh à prajż
fum gyłyk! Oder wen dy mǎlajħt-wen kymst, wa’ħi ju nymer
ny wysa, wen māj hac biex djyr zájn zo. Má djef trädycyja hon.

– Wos ej à tradycyj?

– Dos ej ou fergasa gywiöda – ziöet der Föks – Dos ej yhta,
wo án tag fu ám andyn andyšt maht, à štund fu ár andyn štund.
Māj jegħiġi cym bájspil hon à tradycyj. Ym dunyštag tanca zy
myta māk ja fum diöf. Dunyštag ej diöħ dos à fajner tag! Bo
derżánk tħijs yh ju bocum wájngiöeta dergejn. Wen dy jegħiġi
wixx mǎlajħt-wen gejn tanca, to wje ider tag ázu nymlik zájn

án yhy wje ni ká walantus ny hon.

Zu wiöd der Kliny Fjyšt mytum Föks com. Án wi dy cájt fum odanka nynder kom:

– Áh – ziöet der Föks – Yhy mü gress...

– Dy byst ju dos zoüwer sylik – ziöet der Kliny Fjyšt – Yhy wje ny weła, do's der ny wejwułt, oder dü wułdst fu mjyr, do'h dih mah com.

– Ázu ej dos – ziöet der Föks.

– Oder eta müsty gress! – ziöet der Kliny Fjyšt.

– Ázu ej dos – ziöet der Föks.

– Ázu hösty ju nist ny gywuna!

– Yhy ho gywuna – ziöet der Föks – Dy wásafiöerw.

Á nöhta ziöet'á dercün:

– Gejže án šou der že dy ruza wejder o. Dy wyst ju wysa, do dáj Ruz ju dy áncikjy ej. Dü wyst ju cün mer cyrykkuma án mjyr odanka án yh wa der á gyhájmy kájt ziöen.

Der Kliny Fjyšt ging wejder yn ruza ácü.

– Jyr zájt ny wi máj Ruz, der zájt ju nist – ziöet'á – Nimyd ej myt'üh ny com gywiöda án jyr hot'üh myt nimanda ny com gymaht. Jyr zájt dos, wo máj Föks ejer wiöe gywast. Á wiöe nok á föks wi hundyt toüzyt andry. Oder yh ho'á cy





mem gyšpon gymaht án et ej'á der áncikjy ufer wełt.

Dos byśamt dy ruza ju fest.

– Jyr zájt šejn, oder šiliöegik – ziöet'á nö – Fjyr jüh kon má ny štarwa. Frálik, do áner, wo ferhejngejt, wo'á máj Ruz höt gyzan, kon zy fyr ány fön'üh hon. Oder y zejh zoüwer ej zy hefa wihtikjer wi jyr oły, bo zej ej di, di yh undergosa ho. Zej ej di, wo yh zy undys głozkrigla štełt. Zej ej di, wo yh zy myt ám parawan bywjet. Zej ej di, wo yh zy byroüpt (ok cwǖ lis yh zájn, do zy mulkjadrymułn wada). Án zej ej di, y wyler yh cühüht, wi zy mer zwandlát oba zih tot ośpejla oba öü miöehysmöł štył zos. Bo ejs ej máj Ruz.

Do ging'á cym Föks cyryk.

– Ław güt – ziöet'á...

– Ław güt – ziöet der Föks. – Dö ej máj gyhájmy kájt. S'ej ju gwynlik: Güt zit mà nok mytum hac. Dos, wo ej wihtik, bławt fwy dy oüga ungyzan.

– Dos, wo ej wihtik, bławt fwy dy oüga ungyzan – ziöet'um der Kliny Fjyśt ánöh, do'á jum dos ym hiöet byhełt.

– Dy cájt, wo dy zy y der Ruz höst gan, di gyt y der Ruz zöfuł zoc.

– Di cájt, wo yh y mer ruz ho gan – ziöet'um der Kliny Fjyśt ánöh, do'á jum dos ym hiöet byhełt.

– Dy łoüt hon di würyt fergasa – ziöet der Föks – Oder djyr ys's ny derliöet, zej cy fergasa. Dü bystand y dam öbaht šylik, wo dy ogycymt höst. Dy bystand y der Ruz öbaht šylik...

– Yhy bej y mer Ruz öbaht šylik... – ziöet'um der Kliny Fjyśt ánöh, do'á jum öü dos ym hiöet byhełt.



XXII

- SKIÖEKUMT – ZIÖET DER Kliny Fjyšt.
- Skiöekumt – ziöet der Štákjaájryhter.
- Wos mahsty dü? – fret der Kliny Fjyšt.
- Yhy cysortjy dy pasažjyn toüzytwájz – ziöet der Štákjaájryhter – Dy cyg, y wyła zy ráza, šyk yh ámöl ráhts, ámöl lynks.

Àn à gyświnddcug, wo šioefliöeht àn brumt wi's'dunerwater, cyśotułt s'ájryhthoüzła.

- Zy fijdyn zih – ziöet der Kliny Fjyšt – Wos zihja zy?
- Der banšofer wá's zoüwer ny – ziöet der štákjaájryhter.
- Do fü à ander gyświnddcugmytum krawal byliöeht ferhejn, ok dos möl uf à ander ryhtnan.
- Zájn zy sun cyryk? – fret der Kliny Fjyšt...
- Dos zájn ny dinymlíkja – ziöet der Štákjaájryhter – Dos ej à toüš.
- Wün zy diöt ny cyfrejd, wu zy grod wün?
- Wer zájn ju nymer ny cyfrejd, wu wer zájn – ziöet der Štákjaájryhter.

Àn à dryter cug fü myt krawal byliöeht ferhejn.

- Fiöen zy y dan jýsta pasažjyn ánöh? – fret der Kliny Fjyšt.
- Zy fiöen y nist ny ánöh – ziöet der Štákjaájryhter. – Zy šlöfa nok ájnum oba zy gann nok. Nok dy kyndyn štusa jyr noza cyn fanstyn roüs.

– Jok dy kyndyn wysa, wo zy zihja – ziöet der Kliny Fjyšt –
Zy gan jyr cájt y ám táklaán ejs hon zy ym zoc, án wen má's'á
wágnymt, gress zy...

– Zej hon gyłyk – ziöet der Štákjaájryhter

XXIII

– SKIÖEKUMT – ZIÖET DER Kliny Fjyšt.

– Skiöekumt – ziöet der Handułmon.

S'wiöe á handułmon, wo'á prioeškja kám düšt höt ferkoüft.
Má šlung án zyta prioešek uf á woh án má hot sun mej ny diöft
trynkja.

– Fyrym handułsty myt dam? – ziöet der Kliny Fjyšt?

– Myt dam kon'á hefa cájt śpiöen – ziöet der Handułmon –
Dy gyliöeta hon's ufgyrähjyt. Má kon drájáunfuncik minüta
yr woh ájśpiöen.

– Án wos maht má myt dan drájáunfuncik minüta?

– Má maht myt dam wo'á wył...

– Yhy wje... –ziöet der Kliny Fjyšt cy zeh zoüwer – Wen
yh mer wje hon drájáunfuncik minüta derśpiöet, wje'h mer
kyna ámalüssü cy ám bün gejn...

XXIV

S'WIÖE UFA AHTA tag nö mem foł ufer wistaj, wi'h dy gyšihta fum Handułmon ghyüt ho án s'lecty wosertropła fu mem fürrot öusgytrunka hot:

– Á! – ziöet yh cym Klina Fjyśta – Daj gydanka zájn ju zjyr sejn, oder máj eroplon ej nö ny gyryht gywiöda, yhy ho ju mej nist ny cy trynkja án yh wje ju zájn zjyr fruł, wen yh mer wje kyna ámalüsü cy ám bün gejn!

– Máj gyšpon, der Föks – ziöet'á cün mer...

– Máj klin menčla, s'gut ju kán Föks mej ny!

– Fyrym?

– Wáł's yns derdjęsyjt.

Á ferstind ju máj argumenta ny, á ziöet mer cyryk:

– S'ej güt án gyšpon cy hon, oü wen'á štarwa mü. Yhy bej fruł, do'h án Föks oüz gyšpon ho...

“Á derwás dy groüzlikkajt ny – ziöet yh mer – Á hyngjyt ny áni djuryjt ny. Ábyselüćü zunašajn ej ołys, wo'á djef hon...”

Do zoh'á mer cü án'á ziöet mer uf men gydanka cyryk:

– Mejh djuryjt's ju oü... Zihwer án bün...

Yhy štyułt myta henda ony höfnan, bo s'hot ju kán zin, cüfelik án bün yr wájta wistaj cy zihja. Oder wjyr nöma yns án wer gingja.

Wi wer zu štundałang cyzoma wandyta, hot's zih byfynstyłt án dy štam funga o cy šajnn. Yhy bytraht zy wi y ám troüm, s'duryjt mih zu, do's mih ejwerfrü. Dy wjytyń fum Klina Fjyśta tancta mer ym ferstand rym:

– Do duryjt's dih oü? – fret yh.

Oder á ziöet mer uf dos ny cyryk. Á ziöet gywynlik:

– S'woser kon oü s'hac łyndyn...

Yhy kund uf dy bydájtnan fu dan wjytyn ny kuma, oder yhy mält mih ny... Yhy wöst, do má'á mej ny tüs fren.

À wiöe ájgykámát. À floót zih nejder. Yhy floót mih ju dernawa. Nö ám wájla ziöet'á:

– Dy stam zájn šejn, diöh à blimla, wo wy's ny zan...

Yhy ziöet „frálik“ án bytraht dy fałda fum zand ym möndaśajn.

– Dy wistáj ej šejn – ziöet'á dercün...

Án dos wiöe wirklih wür. Yhy ho dy wistáj inda łiw gyhot. Mázyct uf ám śyghejwuł. Má zit ju nist ny. Má hjyt ju nist ny. Oder yhta liöeht füt yr stył...

– S'maht dy wistáj šejn – ziöet der Kliny Fjyśt – Do zy jynta án bün hejnlet...

Mejh hot's wunder, gylik hot yh s'gyhájmy zandlöühta bygryfa. Wi'h à büw wiöe, ławt yh y ár ołda hyt, án à wundermjer hot derylt, do's à śac diöt byhakt wiöe. Frálik, do nimyd dan śac ny kund ufzihja oba giöe's cy priöebjyn.



Oder di wundermjer höt di hyt byrüfa. Máj hyt hot á gyhájmy kájt y jym hac hejngylet...

– Ju – ziöet yh cym Klina Fjýsta – Op's dy hyt, dy štam oba dy wistáj ej, wos zy séjn maht, ej ungyzan!

– Yhy bej fruł – ziöet'á – Do dy giöe zu wi máj Föks medytjyst.

Wi's á Klina Fjýsta der šlöf nom, nom yh'á uf máj henda án yh ging weter. Yhy wiöe byrüt. Mejh doüht's, do'h trüg á háklikja šác. Mejh doüht's, wi wen's nist háklikjerysufer Ad ny wje gan. Ym líht fum möndašájn bytraht yh záj bláhy štjyn, záj cügymahta oüga án záj gydryta lóda, wo zy ym wynd fürgáta án'á ziöet mer: „wo yh dö za, ej jok á šyht. Dos würikjy ej ungyzan...”

Záj ábyselüćü ufgymahta lópa wyza mer á klin láhułn. Yhy ziöet mer nö: „Wo mih ázu zjyr y dam šlyfnikja Fjýsta byrjyt, ej záj tráj cy zem Błimłka, s'ej der öebroz fu ár ruz, wo'á diöhlioeht wi s'fojela y ár lamp, oü wen'á šlyft...” Do šán'á mer nö háklikjer cy zájn. Má djef uf dy lamp öbaht gan, bo á wyndišy broüt kon zy feleša...

Án wi'h ging, kom yh ym mügfjafri y ám bün ácü.



XXV

– DY ŁOÜT – ZIÖET der Kliny Fjyśt – Fiöen yn gyświndcyg, oder zy wysa ny, wun zy weła. Zy dercjyna zih án zy dryn zih ju rym.

Àn’à ziöet dercün:

– Dos ej dos mi ny wat...

Der bün, kà wyłum wer wün derkuma, wiöe ny ázu wi dy ander bjyn fur Sahar. Dy bjyn yr Sahar zájn nok łehjyn, oüsgyhakt ym zand. Dar sóüt oüs wi à gywynlikjer bün y ám diöf. Oder dö go’s kà diöf, án mejh doüht’s, do’h triöemt.

– S’ej ju wyndelik – ziöet yh cym Klina Fjyśta – Ołys ej fjetik: dy śpył, s’amper án dy śnür...

À laht, lis dy śnür án dy śpył runderfoła. Án dy śwengzuł kwić wi à ołdy wyndmejtl, wen der wynd hot łaŋ gyślöfa.

– Hjysty? – ziöet der Kliny Fjyśt – Wjyr wekja à bün uf án’à zyngt...

Yhy wułd ny, do’á zih ejwermynikt:

– Ło mejh že dos maha – ziöet yh – S’ej ju fjyr dejh cy śwjer.

Àmałik cug yh s’amper bocum rand fum bün. Yhy stełt’s głajh. Y men ün hüt yh nö s’lid fur śwengzuł kłyngja án ym cypłoćjyta woser zoh yh dy zun cytyn.

– Mejh dýjsjyt dos woser – ziöet der Kliny Fjyśt – Ło mih trynkja...

Àn yh bygráf, wo’á gyzüht hot!

Yhy hüw s’amper cy zen łypa uf. À trunk myt cügymahta oüga. S’wiöe wi à háltag. Dos woser wiöe hefa mejer owi à trunk. S’wiöe oüsgykwuła fum füsgang undyn stam, fum

wyndzyngja, gybüñ fur at fu men henda. S'lyndyt s'hac wi à gyšenk. Wi'h nö büw wiëe, wün dos dy lihtla ym krisboüm, dy müzik fur pástüskjamas án dy gyhałdakájt fum łáhułn, wo zy à würikja glanc fun wájnahtagyšenkja mahta, wo yh zy krigt.

– Dy łożüt by djyr – ziöet der Kliny Fjyśt – Hon fynf toüzyt ruza y ám gatla... án füt kuma zy ny uf dos, wo zy zihja...

– Zy kuma uf dos ny – ziöet yh cyryk...

– Án füt wjyn zu kyna y ár ruz oba y ám šlung woser uf dos kuma...

– Ázu ej dos. – ziöet yh cyryk.

Án der Kliny Fjyśt ziöet cy dam:

– Oder dy oüga zájn blynd. Má djef mytum hac zihja.

Yhy hot gytrunka. Yhy krigt ödum ufs nojy. Der zand höt ym mügjafri à zyty fiöerw wi hung.

Yhy wiëe diöh di hungfiöerw gyłyklik. Myt wos zułd yh mih zügja...?

– Dy müst daj ferhåsa derwejwułn – ziöet der Kliny Fjyśt myt öbaht, wi'á zih cün mer cüftloćt.

– Wosfer á ferhåsa?

– Dy wåst füt... á fraskiöb fjähr men baruś... Yhy bej öbaht sylik y dam bliṃla!

Yhy cug mág gykrysul fum tiöerba roüs. Der Kliny Fjyśt zoh'um cü án'á ziöet mer myt łaha:

– Daj baobaba šoün öz wi kroüthiöetla...

– Oh!

Yhy wiëe ju zjyr štułc fu men baobaba!

– Daj Föks... záj ün... zy šoün ábysla oüs wi hjenyn... án zy zájn cy łang!

Án'á łahrt wejder.

– Dy ferzist, klin menčla, do'h bocy dar cájt nist andyštys ny

hot ufgymölt, wi àn gyłosa àn ufgymahta boåyter.

– O! S'gejt – ziöet’å – Dy kyndyn wysa’s...

Zu mölt yh à fraskiöb. Ån máj hac wiöe ferstiöert wi’h’äm go. -Dy stüdjyst cy maha yhta, wo yh ny wås.

Oder à ziöet mer ny cyryk. Å ziöet:

– Wåsty, máj foł uf dy Ad... Mün ej dy roćnic fu dam...

Nö ár poüz, ziöet’å:

– Yhy kom dö ganc nönd gyflöga...

Ån’å wiöd rytlík.

Gük yh ny wöst, diöh wos, tot’s mer grod wyndelik wej. Do füł mer à frög áj:

– Åzu dos ej ju ny cüfelik, do dy s’mügjys, wi’h der aht tag y dam bygånt, zu ganc åłan, toüzyt májln fu ám bywönta łand śpacjytst? Dy gingst diöt cyryk, wu dy gyflöga kuma wiöest?

Der Kliny Fjyśt wiöd wejder rytlík.

Ån yhy ziöet unpewnik dercün:

– Fylájht wiöe dos dy roćnic...?

Der Kliny Fjyśt wiöd nö ámöl rytlík. Å hot nö nymer uf kå frög ny cyrykgzyziöet, oder wen mà rytlík wjyd, do hást dos „ju”, cy ny?

– Å – ziöet yh cünum – yhy fjet mih...

Oder à ziöet füt rüik cyryk:

– Dy müst eta y dy at. Dy müst wejder cy der mäśin gejn. Yhy štej dö uf dejh hiöera. Kuże mün s’öwyts wejder...

Mejh höt dos ny gyštyłt. Yhy gydöht fum Föks. Má dzyft ábysla gress, wen mà com wiöe gywiöda...

XXVI

BYM BÜN ŠTIND à ołdy rujin fur štānmoüer. Wi'h ufa andyn tag s'öwyts fur at cyrykkom, zoh yh diöt fu wájtum men Klinia Fjyśta flećja án záj fisa runderbimbułn. Án yh hüt'á ziöen:

– Dy gydenkst ju ny mej? – ziöet'á – S'wiöe ju ny ganc dö!

Unfercwájwułt hüt y zem cyrykziöen imyd cü, bo'á ziöet:

– Ju ju, dos ej dar tag, oder dos ej ny dar płoc...

Yhy ging ju kár wand weter. Mejh doüht's, do'h nimanda ny za áni ny hýj. Oder der Kliny Fjyśt ziöet wejder o:

– ...No frálik. Wysty zan, wu máj śpür ym zand ofyngt. Łejgže diöt uf mejh hiöera. Yhy wa ju hoüt s'öwyts diöt zájn.

Wi'h cwencik metyn fur wand wiöe, zoh yh weter nist ny.

Nö ám wájla kuzt der Kliny Fjyśt wejder:

– Hösty à güty gejft? Bysty zyhjer, do'h ny wa łang łajda?

Yhy bła mytum śwjera hac štejn, oder yhy wöst weter nö, wo's zih hot.

– Gejże yta wág – ziöet'á... – Yhy wył ro!

Yhy zoh yr wand cü án yh sprung fest uf! Diöt wiöe à yter, kám Klinia Fjyśta ufgystrekt, ány fu dan gała ytyn, wo zy dejh kyna y dresik sekunda gycyłik maha. Yhy cug à pistoł fu mem tiöerba roüs án yh łuf cü. Oder by dam krawal, wo yh maht, zunk dy yter wi à öusgydjerter woserštrima yn zand runder án ámałlik, myt ájzera gyrośuł, höt zy zih diöh dy štān diöhgyślyhja.

Grod uf dy cájt derkritt yh dy wand án yh ho à Klinia Fjyśta gyknyćt, à wiöe ju śnejwájs.

– Wosfer à kistiöeryj ej dos! Kuzty eta myta ytyn!

Yhy ho ju fönnum záj gyłdera hájćłatihła wággynuma. Yhy ho jum dy šlyf bytriöest án cy trynkja gan. Oder yhy tüš'á ny weter fren. Á zoh uf mih myt ahtnan án'á let záj hand uf máj hałc. Yhy śpüt záj hac kłopa wi fu ám fygjeła ym kunán, wo's derśosa ej gywiöda. Á ziöet:

– Yh bej fruł, do dy höst gyfunda, wo y der máśin gyfałt höt. Dy konst ju eta yn ham cyrykkuma...

– Fu wun wásty dos?

Yhy wułd'um grod fercyła, do'h y ider höfnan átkán, ho y mer at postärćát.

Á mält zih uf máj frög nist ny, oder á ziöet cü:

– Oü yhy wa hoüt yn ham kuma...

Á nöht ájgydumját:

– Dos ej ju hefa weter... hefa śwjener...

Yhy śpüt yhta ekstra gyśan. Yhy knyct'á fest y men henda owi á kynd, án's doüht mih füt, do'a mytum hiöet byfür y á höł rofił, án yh kund'á ny bywjen derfjyr...

Á sóüt myt ahtnan ys wájty:

– Yhy ho den barüs. Án yh ho á kosta fij den barüs. Án yh ho á fraskiöb...

Do łahułt'á ájgydumját.

Yhy hiöert á langy cajt, wá'lá zih mejer án mejer derwjemt.

– Klin menćla, dü höst ju strah gyhot...

Frälik, do'a hot strah! Oder á łahc ju łajhtüśik:


– Yhy wa hon nö mejer strah hoüt s'öwyts.

Wejder tot's mer bang, do's ufs gyśyk nist ny kon hyłfa. Do'h dos łaha mej ny zo hjyn, yhy kund dan gydanka ny oüsstejn. Fjyr mejh wiöe dos wi á bün ufer wistaj.

– Klin menćla, yh wył dih stájd łaha hjyn.

Oder á ziöet:

– Hoüt s'öwyts wyt's á jür zájn gywast. Máj stam ej yta għajj



ejwum płoc, wu yh jes jür bej rogyfoł.

– Klin menćla, cy ej dos ny nok à bejzer troüm myt dar yter
ám myt dam cüstyma mytum štam...

Oder à ziöet mer uf dos ju nist ny cyryk. À ziöet:

– Wo ej wihtik, zit'á ny...

– Frälik...

– S'ej wi mytum błimła. Wen dy à błimła höst gan, wo's uf
ám štam wönt, do ys's šejn, s'nahts ym hymuł cücyzan. Oły
štam hon błimła.

– Frälik...

– S'ej wi bym woser. Dos, do dy mer gost cy trynkja, wiöe wi
müzik, dy swengzuł ándy śnür... Dy gydenkst... s'wiöe güt.

– Frälik...

– Dy wyst ju s'nahts yn štam cüzan. Máj štam ej cy klin, do'h
der'á wje kyna wajza. Ázu ys's beser. Máj štam wyt fjyr dejh
áner fu dan štam bławjn. Ázu wysty y oła štam gan cüzan... Zy
wan oły daj gyśpona zájn. Án derzánk wa yhy der à gyšenk
maha...

À łah t wejder.

– Á, klin menćla, klim menćla, yhy ho zu łiw, y dam łaha
cücyhühja!

– Grod dos ej máj gyšenk... S'wyt zájn wi myt woser...

– Wos mánsty myt dam?

– Dy łoüt hon jyr štam, wo zy ny zájnnymlik fjyr idyn. Fjyr
miöehja wagabunda zájn dy štam byłatyń. Fjyr andry zájn
zy nok kliny łihtła. Án wejder fwy dy ander, fwy dy gyliöeta,
zájn zy umštend cy füšja. Fjyr men Koüfmon wün zy fu gułd.
Oder oły di štam málta zih ny. Dü oder, dü wyst dy štam hon
wi zyst-káner...

– Wos mánsty?

– Wen dy s'nahts ym hymuł cüzyst, diöh dos, do yhy uf ám

föna ław, do wyt's fyr dejh zu zájn, wi oły štam wjyn łaha, bo
yhy uf ám łah. Nok dü höst štam, wo zy łaha kyna!

Àn' à łah weter.


– Àn wen dy der öusgyhułfa höst (mà hyłft zejh zoüwer inda
oüs), wysty fu dam fruw zájn, do dy mih höst gykant. Dy wyst
uf inda máj gyśpon błajn. Dü wyst myt mer inda gan mytlaha.
Àn dy wyst miöehysmöl ufmaha daj fanster, gywynlik zu, cym
ferblajn... Àn daj gyśpona wan der scüdát cüzan, wi dy łahst,
wen dy ym hymuł cüzist. Do ziöesty: „Ju, dy štam brengja mih
inda cym łaha!” Àn zej wan dejh hon fyr án niöen. Do wa yhy
der hon à štykla fjetik gymbaht...

Àn' à łah weter.

– S'wyt zájn, wi wen yh der dy štam ny wje hon gyśankt, ok
kliny klengjeła, wo zy kyna łaha...

Àn' à łah weter, à nöhta wiöd' à gyzect:

– Hoüt s'nahts... dy wäst ju... kuże ny.



– Yhy wył dih ny lön áłan.

– Yh wa oüssöün, wi wen's mer wje wejtün... S'wyt ábysła zu oüssöün, wi wen yh wje štarwa. Ázu ej dos. Ku mer ny cücyzan, dos wyt ju ny wejwułn...

– Yhy wył dih ny hynderlön.

Oder à hot kumer.

– Yhy ziöe dy's... S'ej oü diöh dy Yter. Zy djef dih ny bájsa... Ytyn zájn bejz. Zy bájsa fum gylysta...

– Yhy wył dih ny lön áłan.


Oder yhta byrüt'á:

– S'ej wür, do zy fyr án andyn bysa ká gejft mej ny hon...

Y dar naht wiöd yh ny derwiöert, wi'á wágging. Á ej štylüšik feršwunda. Wi'h sun postárćát, ejn cy derkuma, šrat'á byhend byfür. Á ziöet mer nok:

– Åh! Dü bist dö...

Do nom'á mih fý dy hand. Oder à kymyt zih byštenik nö:



– Dos djefsty ju ny maha. S'wyt dih bytroürikja. Yhy wa öüssoün, wi wen yh wje zájn tut, oder s'wyt ju ny wür zájn...

Yhy blå štył zyca.

– Dy wást ju. S'ej cy wájt. Yhy kon dos łajp myt mer ny mytnama. S'ej cy śwjer.

Yhy blå štył zyca.

– Maj łajp wyt dö ɋejgja blájn, owi à ɍydkjer kerper. Må djef diöh zyty troürikjy kerpyn ny troürik wada...

Yhy blå štył zyca.

Har wië abysla ádfüt. Oder à kámát weter:

– Wästy wos, s'wyt ju fürnym zájn. Oü yhy wa yn štam cüzan. Oły štam wan zájn fíjr mejh wi à bün, mytum śwengzuł. Oły štam wan mer à trunk gan...

Yhy blå štył zyca.

– Dos wyt ju fájn zájn! Dü wést fynfhundyt milon kłengjela hon, yhy fynfhundyt milon bjyn...

Àn' à blå štył zyca, wàł'a grán...

– Dö ej dos. Łö mih nö áłan, àn trejt byfür.

Àn' à fiočt zih, wàł'a zih füt.

À ziöet nö:

– Wästy... maj Blimla... Yhy bej'um öbaht śylík! Àn ejs ej śwahüśik! Àn ejs ej ázu łajhtgloüwik. Ejs höt fíjr nistwatý djenyn, wo zy zy fíjr wełt zeła bywjén...

Yhy fiočt mih, bo'h kund mej ny öüsstejn. À ziöet:

– Dö... Dos ej ołys...

À fiočt nö weter, àn' à štind uf. À śrát ámöl byfür. Yhy kund mih mej ny rjyn.

S'wië ju giöe nist mej wi à gał waterłoühta by zem knyhuł. À blå küçüśik štył štejn. À grán ny. À füł fájn owi à bloat fu àm boüm. S'go áni kà gyrośuł ny, wi' à yn zand runderfüt.

XXVII

ETA EJ DOS grod záhs jür ferhejn... Yhy ho di kistiöeryj nimanda ny dercyłt. Máj kumpana, wo yh zy wejder zoh, wün zjyr fruł, do zy mih nö łanik zan. Yhy wiöe troürik, oder y jyn ziöet yh: "yhy bej ju ejwermynikt...".

Eta ho'h mer ábysla oüsgyhułfa. Dos hást... ny ganc. Oder yhy wás, do'á uf záj planet cyrykkuma ej, wál yh ym mügjafri záj łajp ny kund ufzihja. S'wiöe ju kà zjyr śwjer łajp... Án s'nahts ho's ju liw, yn štam cücyhühja. Zej zájn wi fynfhundyt milon klengjela...

S'gyśjyt füt eta yhta wyndelikjys. Wi'h à fraskiöb ym Klina Fjyśt mölt, fergos yh ju ganc, do'h ufum obrozła án ładerrima cümöla zo. Á wyt ju giöe ny kyna, ym barüs à fraskiöb ufzeca. Yhy fret mih: „Wos ej uf zer planet gyśan? Fylájt höt füt der barüs s'Blimla ufgýfrasa...?”


Miöehysmöł kuz yh mer: „Byştymt ny! Der Kliny Fjyśt dekt záj blimla tagteglík myt ámgłozkrigla cü án'á gyt uf zen barüs öbaht...” Dos maht mih gyłyklik. Án oły štamla flena štyłnik.


Miöehysmöł kuz yh mer oü: „Wer gan ju ynáncik kà öbaht, án dos ej gynüg! S'kon mejglík zájn, do'á ámöł s'öwyts s'glozkrigla fergos oba der barüs ej ámöł s'nahts štyłnik ferśwunda...” Do wada dy oła klengjeła wosertropa...!

Dos ej ju à grusy gyhájmy kájt. Fjyr oüh, wo jyr à Klina Fjyśta hot liw, án oü fjyr mejh, ys's ny giöer'ás, wen's jynt yr gyśykwełt án barüs gyt, wo wer'á ny kena, wen'á à ruz ufgýfrasa höt, oba ny.

Zatże ym hymuł cü. Fret'üh: Höt der barüs s'Blimla ufgýfrasa oba ny? Do water že zan, wi ołys andyśt wjyd...

Án káner fun grusa łouł wyt ni uf dos kuma, wi wihtik's ej!





Fjyr mejh ej dos dy śynsty án dy trüweniksty oüszicht ufer wełt. S'ej dinymlikjy wi di, wo derfjyr wiöe, füt ho'h zy ámöl ufgymölt, do dy gancy grys gywejza ej. Grod dö ej der Kliny Fjyśt ufer wełt ádstdanda án dö ej'a oü ferśwunda.

Zatže uf zy myt öbaht, do der zułt zájn zyhjer, do der zy wejder ámöl derkent, wen der fylajht ámöl diöh dy wistaj y Afryk wandyt. Án wen der diöt wat zájn derkuma, gejtze ny gryhta weter, ok blijtze, wi'h'üh byt, ábysla under dam štam hiöera štejn. Wen derzánk à kynd cün'üh kymt án łahułt, án wen's gyłdera łöda höt án uf ká frög ny cyrykziöet, to wyt's'üh ju wyslik zájn, war dos ej. Do zájtze ázu mił! Łöt mih že ny trouřik zájn: śrajwt mer, wen'a nok cyrykkuma ej...

FJYR FÜRWÜT...

ŠTOT S'FÜRWÜT CY śrājwa, kom yh uf dos cy bysrājwa, wi der Kliny Fjyšt uf Wymysou kuma wiöe án wo'á höt y ynzer liwa hamyt gytrofa.

Dos wiöe á šejner zumertag. Derzank wiöe dos s'jyšty möł, wi'á uf Wymysou kuma wiöe. Á züht y Wymysou gyšpona. Á floćt zih ufum Rynk nejder án'á wułd dy łouüt cyma. S'wün hefa ferhejnganga. Zy šoūta cü, miöeha myt łahułn, dy andyn šöhta šlymp. Á bygánt y ám kłopa, wo jum s'felićüpe ny wułd weter fiöen. Der Kliny Fjyšt wułd, do'á jum á baruś ufmölt. Oder á wułd ny. Á hot ju ká cajt ny. Do nom der grajn á Kliny Fjyšta, oder á zoh füt án baruś ferhejngejn. Dar wułd oder mytum ny myt, dar wułd nok groz frasa, wo ufum Rynk wühs. S'go án kyngja, wo'á myt oła wułd regjyn. Oder káner fülgħt y zen għbota. Wi zy jum zu ny għiġiha, għböt'á dos, wo dy għrysyn hon għbota. Án fħid ynzyn klini gast hot'á ka ahtnan. Oü á pyfuł ej y ynzum Fjyšta yn wág kuma. Dar wułd zih ok łöwa án fun andyn ogħyan wada. Wi der Kliny Fjyšt'um ny għinuż ozan go, hynderlīs' á'án.

Á loper ej'um oü bygánt. Dar zos án šept án'á mält zih ju nist ny. Ejn interesjyt nok záj trunk, oder nok, wi'á wiöe byzöfa. Zyst wiöe'á á ganc anštendikjer menċ. Oder lihtyn wiöe'á ni ny.

Á koüfmon wiöe oü diöt. Á rāhyt záj giełd, wifuł'á ufum jümtyt höt għwuna. Fun zyta klini menċla, wi ynzer gast, maħt'á jum nist ny deroüs. Á hot ym hiöet zaha, wo jum giełd án fàld brengja, ny zyty dułyta, wi għiġiha, mynkjyt án liwa. Ufum Rynk ging oü rym á naħħwahter. Dar wiöe fun oħda cajta gykuma. Á kund ny feršwanda, bo záj latar wiöe feršwunda.

Štot s'fürwüt cy śrajwa, kom yh uf dos cy byśrajwa, wi der Kliny Fjyšt uf Wymysoü kuma wiöe án wo'á höt y ynzer liwa hamyt gytrofa.

Dos wiöe á šejner zumertag. Derzank wiöe dos s'jyšty möł, wi'á uf Wymysoü kuma wiöe. Á züh y Wymysoü gyšpona.

Á floć zih ufum Rynk nejder án'á wułd dy łoüt cyma. S'wün hefa ferhejnganga. Zy šoüta cü, miöeha myt łahułn, dy andyn šöhta šlymp. Á bygánt y ám kłopa, wo jum s'feličüpe ny wułd weter fiöen. Der Kliny Fjyšt wułd, do'á jum á baruś ufmölt. Oder á wułd ny. Á hot ju ká cajt ny. Do nom der grajn á Kliny Fjyšta, oder á zoh füt án baruś ferhejngejn. Dar wułd oder mytum ny myt, dar wułd nok groz frasa, wo ufum Rynk wühs. S'go án kyngja, wo'á myt oła wułd regjyn. Oder káner fülgħt y zen għbota. Wi zy jum zu ny għiġiha, għböt'á dos, wo dy għrysyn hon għbota. Án fijr ynzyn klini gast hot'á ka ahtnan. Oü á pyfuļ ej y ynzum Fjyšta yn wág kuma. Dar wułd zih ok łöwa án fun andyn ogħyan wada. Wi der Kliny Fjyšt'um ny għinuż ozan go, hynderlīs á'án.

Á loper ej'um oü bygánt. Dar zos án šept án'á mālt zih ju nist ny. Ejn interesjyt nok záj trunk, oder nok, wi'á wiöe byzöfa. Zyst wiöe'á á ganc anstendikjer menċ. Oder lihtyn wiöe'á ni ny.

Á koūfmon wiöe oü diöt. Á rāhyt záj giełd, wifuł'á ufum jümtyt höt għwuna. Fun zyta klini menċla, wi ynzer gast, maħt'á jum nist ny deroüs. Á hot ym hiöet zaha, wo jum giełd án fald brengja, ny zyty dułyta, wi gyšpona, mynkjyt án liwa. Ufum Rynk ging oü rym á naħħwahter. Dar wiöe fun oħda cajta gykuma. Á kund ny feršwynda, bo záj ītar wiöe feršwunda. Á kund dy tag áni dy štunda mej ny rāhyn. Á pluntat zih rym ufum Rynk, á għiġi ny y di cajt.

Á geografer zos by ám tyśla án'á študjyt dy papjyn. Á byfret

ynzyn Klina Fjyšta. Oder rjyn wułd'a zih ny, oü ny, wen's yhta wihtikjys y Wymysoü oüscymytułn wiöe.

Wi'ā zu ufum Rynk fercwájwułt floćt, ging'a weter. Kám kjyhüf. Diöt trof'a uf hefa bliṃla. Bratkja án fjołkja. Án oü uf dy zumerstrejzła, wo zy ázu šejn štunka. Diöt derwiöert'a, do jum hefa oüga cüzan.

Tyń go's diöt fejl. Di kruha rym. Di wułda'a bájsa ymázyst. Oü wen zy ká maht ny hota, wi der Kyng. Oü wen zy ká giełd ny krigta, wi der Koüfmon. Oü wen zy ny gyfret wiöda. Záj Ruz kund'a under dan fjołka án bratkja ny derwiöera. Endlik kom'a uf ány. Di šoūt oüs wi Záj Ruz. Á kynd zy gryht hon ejwerbata, gryht'er olys oüsgybeht, wo jum ym hac łog. Oder di mált zih ny! Wiöe zy bylájdikt? Wiöe zy tut? Wi'ā jum ázu cüzoh, ej'a gywiöert gywiöda, do's tut wiöe, oder ny gyściörwa! Wi ej dos mejglik, wos zuł yh tün, frájyn zih, oba genn? – doüht's'a. Dy Ruz wiöe gyściörwa, ok uneht.

Wos ej nöhta mytum Klina Fjyšta gyśan? Ej'a fun ytyn derbysa gyblejn? Ná, uf ejn het ju imyd kuma, án gryhta weter gyziöet. Har ej uf záj planet gyfiöen. Á nom à oüł, wo zy fu ár dergyfta lynd wułd ádkłoüfa. Har kon'er hon ferhåsa, do'a jyr án baobab wahsa lyt, do zy diöt jyr hamyt fynt. Án ázu zájn zy ołybády fu Wymysoü owi cwe ućekińjen wàggyflöga. Zájtze pewnik.

Der ány, wo'a fum Klina Fjyšta gycomt wułd wada, tüś ny ufa Rynk. Diöt zájn cy hefa łoüt án cy grus krawal. Ufa kjyhüf kund'a oü ny. Diöt blyn oły lynda gyfełt, dos wiöe owi à wistáj. Án der bün wiöe ferdakt. Diöt kund'a nok derdjęsjyn.

Wer hon y Wymysoü gynüg wistája, gynüg gatła án gynüg hejweła. Oü kyngja, łopyn, koüfloit, handlyża, geografyn, ruza, barüsa, föksa án pyfułn fała yns ny, zu wi oü dy ytyn. S'falt yns jok der Kliny Fjyšt, wo'a wje yns cyma. Bo troü

zájwer ny, áner ym andyn.

Fylájht wyt'á ámöl cyrykkuma? War'ás. Wer wan hiöera.
Uf ynzer, wymysiöejer wistáj, yns oły, wo wer yns funander
ohon, com cy maha.



Der Kliny Fjyšt y wymysiöejer flák
(gymölt fum Jüšja fum Biöetuł).

ŚTYŁ, ŚTYŁ, ŚTYŁ WÁJŁ S'FJYŚTŁA ŚŁÖFA WYŁ

S'ŁIDŁA, WO WIÖE GYZUNGA UFUM ŚPEKTAKL "DER KLINY FJYŚT"
YM 2014 JÜR Y WYMYSOÜ

Śtył, stył, stył wájł s'Fjyśtła ślöfa wył
Dy stamła wan'um wi kłengjeła
Zyngja, kłengln wi zy weła
Śtył, stył, stył wájł s'Fjyśtła ślöfa wył

Ślöf, ślöf, ślöf māj Klinys Fjyśtła ślöf
Gük gyfrasan fu ár yter
Gosty roüs ju kà gyćoter
Ślöf, ślöf, ślöf māj Klinys Fjyśtła ślöf

Śtej, śtej, śtej, māj Klinys Fjyśtła śtej
Bo'h, bo'h, bo'h ázu troürik wejder bej
Łö mih hühja cü daj kłengln
Łö fur Ruz ny zájn á stengl
Łah, łah, łah māj Klinys Fjyśtła łah

The image shows four staves of musical notation. The first staff is in 3/2 time, key of F major, starting with an F major chord. It consists of two measures of eighth-note patterns. The second staff is also in 3/2 time, key of F major, starting with a C7 chord. It consists of two measures of eighth-note patterns. The third staff is in 3/2 time, key of F major, starting with an F major chord. It consists of two measures of eighth-note patterns. The fourth staff is in 3/2 time, key of F major, starting with an F major chord. It consists of two measures of eighth-note patterns.

melodyj: "Still, still, still"

S'ĀNÖHWÜT.

DER KLINY FJYŚT, dos ej à tekst, wo'á y Wymysoü hefa ájgymengt höt, y gütum zin. Dos wiöe der jysty spektakl, wo y Wymysoü wiöe gyspejlt. Mjyr ziöeta dy łouüt y Wymysoü, do wy's ny zuła fürsteła wymysiöeryś, bo s'wyt nimyd ny ferstejn. Oder yhy stëlt mih'á átkän: myter hylf fum Jüšja fum Biöetuł án Rafał fum Pejter howy's fütgfüt.

Mejh doüht's, do dos štykla ju bygräjflik án wyslik wjed, oü fjyr di, wo zy wymysiöeryś ju giöe ny ferstinda oba nok ábysla bygryfa. Wer hon by dam ju hefa gywuna. Diöh dan spektakl zájn dy spröhideologyja án ájstełnana y Wymysoü andyśt gywiöda. Dy wymysiöerysy spröh ej fu derzynt gyzan oüz á tyater spröh, literatürspröh, á spröh, by wyler mà kon ferblajn, án ny nok uf ár müzik bym asa oba bym brantwajn, ok oü by „hyhjer kultür”, wi zy nymiöhja łouüt tiöefa.

Dan gywejn uscykuma, derlisa ju à piöer bydingnisa. Cyderjyśt wiöe dos à güt ártystaspejl. Dy wymysiöejer (ny nok fum roüssstompa, ok fum hac án grejf) kyndyn, wo zy zih ljeta wymysiöeryś, hon dos zjyr güt ádgan. Zy hon zih ju y kám tyater ny gyljyt, wi zy dos zuła maha án s'wiöe oü ny hefa cajt uf dos olys án füt hon zy's öntik derwejwułt. Under dam wiöe oü der oüstralyśjer komikjer Carlo Ritchie wihtik, wyler fjyr yns inda liw án hacagan wiöe, à dö höt'á dy gancy sytuacyj diöh záj štykla án kynsta derlyndyt. Oü dy dekoracyja, wo zy zy s'Jüšja fum Biöetuł höt fjetik gynaht, hon ny nok yr nut oüsgyhułfa, ok oü cym gywejn derhułfa. Ny s'jysty möł.

Dar spektakl wiöe der jysty. Nöhta wün ander: *der Hobbit*, *s'Ufjer wełt*, *s'Ymertiħla* án zu weter. Zej hon s'wymysiöerysy án dy wymysiöejer łouüt weter gyfüt. S'wymysiöejer tyater ławt weter, án maht wejder nojy zaha, oder der Kliny Fjyśt

błajt cyhiöetas inda öz der jyšty àn diöh dos oü fylajht der wihtiksty spektakl. Derben zájn dy łoüt druf kuma, do má'm ejweron wejwułt, wymisiöeryś cy kuza.

Wihtik wiöe oü dy ájstełnan fun ełdyn Wymisiöejer, wo zy ufum zol ym kráćum derheja wün. Di łeſa zih eta oüs, à wjyr zan'à y dam cü. Zu wi zej y yns hon cügyzan, wi wer uflblita. Eta byłatwer zy, zu wi áner à Klina Fjyšta cyr yter byłat, wi'á gydyłdik owi à barüs cüner ácügráct. Diöt wan zy kyna y jyn Ruza fu ynzer at dercyła.

Wer höfa, do diöh di ejwerzecnan, wo yh myt ynzer gyşpon Joanna Maryniak (Joanna fum Márýnok-Jácki) kám end gyfüt ho, wyt dy štatür fum Klina Fjyšta yn Wymisiöejyn beser bykant wada, àn záj gyšihta wan zy fjyn kám besyn mün.

Tiöma fum Dökter

S'WJYTYNBIHJEŁA –
SŁOWNICZEK

A

áby selüćü – troszeczkę
ájgydumját – zamyślony
ámalüśü – powolutki
änöhziöen – powtórzyć za kimś
dy asteroid – asteroida
dy átkanikkájt – przeciwnieństwo

B

der banštákja – zwrotnica
der baobab - baobab
der barüs – baranek
bawján zih – bawić się
s'blimla – kwiatek
s'blimlapłacła- płatki
dy boáyter – wąż boa
der bün – studnia
bygrájfa – rozumieć
byroüpa – zbierać gąsienice z roślin
byütala – osądzić

C

com – oswojony
cüfelik – przypadkowo
cühühja – słuchać
cüzan – przyglądać się
cyma – oswoić

D

derdżyjyn – umrzeć z pragnienia
derfüšja – zbadać
derfynda – wynaleźć, odkryć
derkrigja – wydobyć
derśpiöen – zaoszczędzić
derwysa – dowiadywać się
derzyfta – westchnąć
der diöhcug – przeciag
djenynek – ciernisty

E

ejwermynikt – zmęczony, spracowany
der epuľboüm – jabłoń
der eroplon – samolot

F

ferbita – zakazywać
fergasa – zapomnieć
ferhejngejn – przemijać
ferhejnlik – ulotny
dy ferkiłnan – przeziębienie
dy fernunft – rozsądek
der fłyśt – książę
flećja – siedzieć, siadać
der föguł – ptak
der föks – lis
der fraskiöb – kaganiec
frejwuł – pretensje
fren – pytać
dy frög – pytanie
fynster – ciemny

G

gan hon – kochać, lubić
s'gatla – ogródek
der geográfer – geograf
glengja – dać rady, udać się
gliöen- wierzyć
glyzera - szklany
grasjyn – grasować
grenn – płakać
gybita – rozkazywać
s'gybjyg – góra
s'gycojg – narzędzia
gydenkja – pamiętać
dy gyhájmy kájt – tajemnica
s'gykuz – mowa, rozmowa
gylik – nagle
dy gyráhtikkájt – sprawiedliwość
gyśajt – mądry
s'gyšenk – prezent
der gyśpon – przyjaciel
gywynlik – zwyczajny, prosty
gyzect – poważny
s'gyzyht – twarz

H

s'hac- serce
s'had – stado
hałda – trzymać, hodować
der handułmon – handlarz
håsa – znaczyć, rozkazać
dy hinyn – kury

hiöera – czekać
s'hvener – róg
dy höfnan – nadzieję
der hymuł – niebo

I

inteligent – inteligentny
interesántyś – interesujący, ciekawy
istnjàn – istnieć

J

der jeneral – generał

K

der kapelüshüt – kapelusz
s'kastla – skrzynka
der kerper – korpus, skafander
s'kjenla – ziarenko
klinüćik – malutki
s'kłengjela – dzwoneczek
dy knösp – pąk
der kosta - skrzynia
kösta – klaskać
krank – chory
s'krawal – hałas, awantura
s'kroüthiötla – główka kapusty
s'krüland – królestwo
kuma uf yhta – zrozumieć coś
der kyng – król

Ł

łahawat – śmiesznie
łajhtgħoūwik – naiwny
łajhtūsik – leciutko, prościutko
ława – żyć
der ɿphober – wielbiciel
ħiw hon – kochać
ħiwa – kochać
der ɬoper – pijak
s'ħotaryhħla – latarnia
ħoġjyn – kłamać
ħoħta – świecić (o lampie)
dy ħoħtsoft – ludzkość

M

málda zih – odpowiedzieć, zareagować
medytjyn – myśleć, rozmyślać
mehtings – zdaje się
dy melānholi – melancholia
möla – malować, rysować
der mulkjadrymuł – motyl

N

der nahtwahter – latarnik
nönd – blisko
nytikja – potrzebować

O

der öebroz – obraz
dy öernung – porządek
dy öet – rodzaj

okriöepnik – okropny
der olifänt – słoń
oüskłoün – wybrać
oüskuma – zdążyć
oüsmytułn – odkryć

P

der pazür – pazur
dy planet – planeta
postärćän – dać rady, udać się, zdążyć
der prioešek – tabletka
der pyfuł – zarozumialec
der pylc – grzyb

R

ráhyn – liczyć
der rānpuś – dżungla
ráza – podróżować
regjyn – rządzić
dy rot – szczur
dy ruz- róża
rytlik – czerwonawy

S

scüdát – zadziwiony

Ś

śajnn – świecić (o Słońcu, gwiazdach)
šepla – pić alkohol
šílioegik – pusty (o kwiecie)
śmżyśnik – dziwny

der šoūzuł – człowiek nieuczestany
der štákjaájryhter – zwrotniczy
der štam – gwiazda
štarwa – umrzeć
der štenguł – łodyga
štoma, štompa – pochodzić
štułc – dumny
štylüšík – cichutko
stylnik – cicho
dy štym – głos
šylik – winny

T

tejgja – nadawać się
der tiger – tygrys
der tiöerba – torba
traktjyn – traktować
trouü – wierny, oswojony
trüwenik - smutny

U

uffrasa - zjeść
underbiöema zih – zlitować się
undergisa – podlewać
dy unghüüzümikkájt – nieposłuszeństwo
ungyzan – niewidzialne

W

wahsa – rosnąć
wihtik – ważny
dy wistáj – pustynia

s'wosertropa – kropla, łza
dy wundermjer – opowieść, bajka, legenda
der wulkan – wulkan
der wücuł – korzeń
wysa – wiedzieć

Y
y imanda öbaht šylik zájn – być za kogoś odpowiedzialnym
dy yter – wąż, zmija

Z
ziöen – powiedzieć
der zunašajn – światło słoneczne
der zunaundergang – zachód słońca

